

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

MATI 2020

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

FONO LAULAU FONO TELE & LAULAU KOMITI AU TOEAINA



Luma: Tunumoso S. Iosia FT (Taitaifono Fono Tele), Iosefa A. Uilelea FT (Sui Taitaifono/Failautusi KAT),
Tavita Anesone FT (Taitaifono KAT), Tua: Rimoni Wright FS (Teutupe), Vavatau Taufao FS (Failautusi Aoao)

O le Aso Faraile 20 Mati 2020 @ 2.00pm, na feiloa'i ai le paia maualuga i le Laulau o le Fono Tele ma le Laulau Komiti Au Toeaina, i le Maota Ioane Viliamu. O le mataupu autū o lea fono, o le faia o se faai'uga faasino i le Fono Tele o lenei tausaga 2020, talu ai aafiaga o le Faama'i Oti o le COVID-19, ua aafia ai le Ekalesia, le atunuu ma le lalolagi atoa. Na sasa'a faaoti le utu a le faimea, liuliu ma fefulisa'i faa-la'au mamafa le utaga i Tamā ma Taitai o le Ekalesia, a o faamalumalu ifo le Agaga Paia sa faalagolago i ai le faatofalaiga. Na laualuga i le silasila a le

fono le faamuamua o le tāua o le soifua maloloina, ma le puipuiga o le fanau a le Atua, e le gata o le au faatuatua ma tagata lotu o le EFKS, ae faapea foi le atunuu ma le lalolagi atoa. Ona faia lea o le faaiuga:

“O le a tolopō le Fono Tele a le Ekalesia o lenei tausaga 2020, o le a lē faataunuuina i le masina o Me pei ona masani ai. E tulimata'i pea aluga ma taualumaga o le faama'i ona toe fetuuna'i ai lea mo le lumana'i, ona tatou toe felogona'i lava lea mo se fuafuaga lelei ma talafeagai mo le Ekalesia.” (silasila itulau 2)

FAASINO UPU

1. Fono LFT & LKAT	1
2. O le Lauga	2
3. Na o Afioga e Tulei mai Fofoga	4
4. Amo lou Satauro	5
5. Osiga Feagaiga EFKS Fagamalo	6
6. EFKS Saleaumua	7
7. O le Sulu i o'u vae...	8
8. Mo Tupulaga	10
9. O le Vairasi Oti	11
10. Tala Galuega Ofisa o Aoga	12
11. Aua e te Taufaavalea	15
12. Solo - 3 Laau Iti	16
13. O e ua fai i Lagi	18

FONO LAULAU FONO TELE & KAT

O lea lava aso na faailoa atu ai le i'uga lenei i le Ekalesia Aoao, i Samoa faapea le nofo a Matagaluega i atunuu i fafo. Sa faapea foi ona tuuina atu ai ma mo'omo'oga alofa o le Laulau i le Ekalesia Aoao, faatasi ma le naunauta'iga ina ia tatalo faatasi le Ekalesia i le Atua ma Lona alofa lavea'i, ia maua se faaolataga mo lenei puapuagā. Malo le tofa saili, malo le faatoatoa. Ia faamanuia le Atua i le Laulau o le Fono Tele faapea le Laulau Komiti Au Toeaina; ia manuia le Ekalesia Faapotopotoga Kerisiano Samoa. *“Ua latou o i le ala, ona fai mai lea o le tasi ia te ia, “Ou te mulimuli atu ia te oe i mea uma e te maliiu atu i ai.” Lk 9:57. Autu Fono Tele 2020: SAVAVALI FAATASI MA IESU*

O LE LAUGA

Tusi Faitau: F. Tuai: Neemia 4:1-6

F. Fou: 1 Korinito 3: 5-15

Matua: *“Auā o le au-faigaluega i matou faatasi ma le Atua”* (1 Korinito 3:9)

Manatu Autū: O le au-faigaluega a Iesu Keriso

Ua tatou malamalama uma i le tāua o le maua o se galuega, ae maise lava i ni taimi e pei ona i ai nei, ma le tatou aumau i lenei nu'u o

Sini, Ausetalia. Auā o le galuega e maua ai le tupe e soifua ma ola ai i le tino, ae maise foi auā le tausiga o le aiga ma mea fai a le Ekalesia. Ae a leai se galuega ua fa'afaigataina nisi itu o le soifua lelei ma le fiafia ma nisi aiā tatau faale-tagata-soifua.

Ae le gata i lenei o le faafaigaluegaina o se tagata o le faaaogaina tatau lea o se taleni po o se mea-alofa o i lenei tagata mo le manuia o le isi tagata. Ae maise foi o le atinae atili ai o lenei mea-alofa i le soifua o se tagata faigaluega. E tatau ona avea ma fiafiaga i le tagata faigaluega lana galuega ua faia. I le ma lenei, ua i ai se fesootaiga malosi faale-galuega i le va o tagata galulue faatasi i lalo o le vaaiga a le Pule.

O le masaniga ma le fetufaaiga i totonu o le galuega, auā o le tuufaatasiga o ni tagata eseese se toatele i totonu o se fale-faigaluega e tasi, o le tagata ma lana matātā faapitoa. O le maopoopoga ma le manuia lenei o le galuega i se fale-faigaluega, pe a faamaoni tagata taitasi uma i lana vaega o le galuega.

O le uiga lenei o le upu a Paulo ua avea ma matua, *“Auā o le au-faigaluega i matou faatasi ma le Atua”*. O loo tautala Paulo faatatau i tagata sa galulue i le galuega o le Tala Lelei i Korinito. E ui ina eseese o latou tau ma igoa, ae ua tasi lo latou faamoemoe ma le ogatotonu o la latou galuega, ua tasi foi lo latou Matai-Pule ua faaao i ai le galuega. Po o Paulo, po o Apolo, po o Kefa po o se tasi tagata – ua galulue uma mo le fausia ma le atinae o le ola faale-agaga o le Ekalesia.

O le fesili – O ai le au-faigaluega a le Atua? Ua masani ona faalupe faifeau ma faletua, o le au-faigaluega paia a le Atua. Ona manatu ai lea o tagata Ekalesia, tiakono, aoao, tinā, tupulaga talavou, ua lē aofia i latou i lea faalupega. Ae o le mea moni, o le au-faigaluega a le Atua o i latou uma ua talia Iesu Keriso i o latou loto ma olaga i le faatuatua ia te Ia, ma ua galulue faatasi ma le Atua mo le faaolaina o isi tagata o le fanau a le Atua.

O le isi foi o tatou fesili – a o fea o i ai le fale-faigaluega o le Atua? O le ofisa tutotonu o lou loto ua afio ai Iesu Keriso na te pulea galuega lelei uma e te faia. O le faatinoga o ia galuega e faia i lou aiga, o lau aoga, ma lau galuega mo soo se mea e te i ai i lea taimi ma lea taimi, aemaise o totonu o le mafutaga a le Ekalesia. E

lautele le fale-faigaluega tatou te galulue ai mo le Atua, “*Auā o i matou o le au faigaluega fa’atasi ma le Atua.*”

E tofu galuega uma ma o latou tulafono e puipuia ai tagata faigaluega, aemaise foi o tulafono tau i amio e ao ina tausisia e le au-faigaluega. A tumau ai o le a tauleleia, ma siitia. Ae a leai o le a faasalaina pe tuliese ma le galuega.

Tatou aiga lotu, o le a sei o tatou mafaufau ane teisi i ni uiga lelei ua mafai ona matauina i le aufaigaluega a le Atua i le Tusi Paia, atonu e mafai ona aoao mai mo i tatou foi. O tagata faigaluega a le Atua, e faamaoni ma tumau ma le lē faagaetia. E lē fefoifoiai pe faalotolotolua.

Ituaiga tagata na e i ai Neemia e pei ona tatou faitauina mai le Feagaiga Tuai, i le tau toe-atinae o pa o Ieruselema. I totonu o faigata o le tauemu mai le taufaifai o tagata, o fili o galuega o loo taumafai e faa loto vaivai Neemia, ina ia aua nei faia le galuega, ae peitai sa le mafai e ia ona tuua le galuega ua ofoina atu i ai lona tagata, e tusa ma lana tali atu i lona valaauina e le Atua e avea mana mea-faigaluega. Na fau ao, fau po le galuega faigata. E mamafa tele le galuega ae toaititi le aufaigaluega. Ae lei faavaivai ai pe afaina le faamaoni ma le lotonuu, loto-Atua o Neemia...Aisea?

“*Auā o le au faigaluega i matou fa’atasi ma le Atua.*” O loo galue le Atua faatasi ma i latou, e pei ona fai mai Paulo, “*Afai ua au ma i tatou le Atua o ai se fa’asagatau mai ia i tatou.*”

E le tioa foi Iesu Keriso ona saunoa manino, “*O se tago i le suo-tosina ma tepa i tua, e le aogā ia ia te au.*”

E le mafai ona avea ni tagata fefoifoiai ma le faalotolotolua ma faigaluega a le Atua. Sei vagana ua tumau i le faamaoni ia Keriso, e pei o le la o le vine ona tumau i le vine moni.

O le fausaga lena ua fausia ai le au-faigaluega a le Atua o loo atagia mai i latou galuega i le Feagaiga Tuai ma le Feagaiga Fou.

E ui lava ina sa le asa foi se faiva ma se maumau i ni vaivaiga faale-tagata o le au-faigaluega a le Atua, e pei ona sa iloa i nisi e pei o Tavita, Saulo, Elia ma Peteru, ae sa mafai ona salamō ina ai i latou mo le faamalosi atili mo mea lelei humanai pea. E salamō ma toe fatufatuai, “*auā o le au-faigaluega i matou faatasi ma le Atua,*” ina ua taliaina Iesu Keriso ma le faamoni. Ona faapea

ane ai lea faatasi ma Tavita i lana Salamo o le Faatoesega, “*Auā ua ou iloa e au lou solitulafono, e lē aunoa foi ona i ai i ou luma o lau agasala,*”...

“*Ia e faia se loto mamā mo au ma ia e faafouina se loto mau i totonu ia te au.*”

Le tatou aigalotu, le fanau a le Atua, o i tatou uma o le aufaigaluega faatasi ma le Atua. O se valaauina maua luga lea mo i tatou uma e avea ma faigaluega faatasi ma le Atua, i soo se galuega lava ua tatou galulue ai, pe faigofie, faigata, pe maulalo, maua luga, pe telē le totoi pe laititi, o loo oulua galulue ai lava ma le Atua, ina ia manuia ai nisi i lau galuega. O le mea taua i le Atua o lou faamaoni ma lou galue lelei ma le alofa i lau galuega.

Le tatou Ekalesia, le au uso galulue faamaoni i le galuega atiae a le Ekalesia. Pe lē moni ea o i tatou o le aufaigaluega faatasi ma le Atua? O Ia lava na mafai ai a tatou galuega lelei uma o lenei tausaga. O le Atua na mafua ai ona tatou maua le loto ma le agaga e galulue faamalosi ai, onosai ma tauivi ai. E pei o la le perofeta, “*E lē o le fitafita, e lē o le malosai a o lou Agaga ua fetalai mai ai le Alii.*”

O le aso pito taua mo le toatele o tagata faigaluega, o le payday, o le aso e totoi ai lana galuega. E maua foi le tau e le aufaigaluega a le Atua. O Iesu Keriso lava na fetalai, “*O lo’u manuia ou te avatu ia te outou, e le faapei ona avatu e le lalolagi,*” ... “*E le maumauina so outou tau i soo se galuega lelei tou te faia e oo lava i se ipu vai tou te avatua i le igoa o le soo.*”

Ae fai mai Paulo, “*E lē se mea faaleaogā lo outou tautigā i le Alii,*” ... “*Ua teuina mo outou le pale e lē mamae lava.*” Tatou galulue lelei, galulue faamaoni ma le faamalosi, ia ola ai ni isi tagata, auā e oo mai le taimi e mātava ai, ae ua i ai sou sao aogā mo le Atua i le lalolagi.

O le Atua lo tatou Atua, o le Atua galue mae’a. O le lu’itau lea mo le tatou Ekalesia, ia galue alofa, galue faapalepale, onosai, galue faamagalo, galue faaola, auā o le pine faamau lea o Iesu Keriso ma le faaolataga na saunia mo i tatou. Faafetai mo lea galuega. Amene.

Peletisala Lima, F.S.

EFKS Fairfield

Pulega Sini i Matu

Matagaluega Niusauelese.

NA O AFIGA, E TULEI MAI FOFOGA...

O LE AVEA MA TA'ITA'I LELEI

1. “O au nei o Tesio, o le ua tusi lenei tusi, ua ou alofa atu ia te outou i la le Alii.” Roma 16:22.

Na siomia Paulo e tagata toatele na ofo atu o latou ola mo ia ma le galuega sa feagai ai (Roma 16:24). O nisi e toetoe lava ina a lē iloa, e pei o Tesio na ia faamauina mafauauga o Paulo ina ia mafai ona tatou faitauina. Ua tatou iloa nisi tala ia Timoteo, ae faapefea Kaio lē na talimālō ia Paulo ma le Ekalesia uma, o Erato le teutupe sili ma Kuato? (16:23). O i latou e pei o isi toatele sa tautua tuāvae mai le paolo, ina ia mafai ona galue ma iloa manino atu Paulo i le malamalama.

Paga lea, pe afai e taunuu nisi taitai i le tumutumu, e fa'aalu o latou taimi e tūlei ese ai isi tagata mai lea nofoaga/tulaga. Ua taumafai e ta'ita'i to'atasi, pule na o ia, sifi aoao; ae mafua mai i le papa'u o le faautaga, lē saogalemū le lagona, ma le fefe i tausinioga. Atonu e lelei mo sina taimi, ae lē umi. Pe afai o lou faamoemoe o le tūlei ese o isi, o le a alu vale lou taimi ma lou malosi i le tulimataiga o isi tagata e te masalomia ma manatu o le a latou faia faapea ia te oe. O se ituaiga olaga faanoanoa tele, ma e lē lelei mo i latou o loo outou galulue faatasi. Fai mai Jules Ormont, O se ta'ita'i sili na te lē tuuina o ia i luga atu o ona soo, vaganā le tauaveina o matafaioi (A great leader never sets himself above his followers except in carrying responsibilities). Pe afai o lena o loo e i le tulaga faa-taitai, aua e te faalagolago i lou tofiga e faatalitonu ai tagata e mulimuli atu. Ia fausia mafutaga fesootai, ma ia manumalo mai tagata. Pe afai e te lē alofa i tagata, o le a lē pine ona e taumafai e liliu i latou i ni auala fai faamalosi ma faatogafiti (manipulation); ma o le a tulai mai ai le maua luga o tagata mumusu, faamavae pe tēteva ese. O nai tausaga talu ai na fai ai le fa'aaliga ma pepese faatasi alii lauiloa i le ato (great tenors) – Jose Carreras, Placido Domingo, Luciano Pavarotti. Ina ua fesiligia e se tasi fai tala fou, pe i ai se faa-tauvaga i le va o tama matutua, na tali Domingo, “E leai, e lē mafai ona i ai se tauvaga pe a faatasia i le faiga o le musika.”

2. “Le Atua e, ia e suesue mai ia te au, ma ia e silafia lo'u loto;” Sala.139:23

Na tusia e le alii fai ata komi o Walt Kelly, Ua maua le fili, ma o i tatou lava. (We have met the enemy, and it is us). O le tagata aupito faigata lava i le lalolagi e taitai, o i tatou. Mata o le natura o le tagata o i totonu o tatou, na te faatupu o tatou lagona e iloilo ai isi tagata uma vaganā i tatou. Ina ua mae'a le faatoilaloina o Koliata, sosoo ai ma le faanunumi ma Patisepa, ona tusia lea e Tavita, “Le Atua e, ia e su'esu'e mai ia te au, ma ia e silafia lo'u loto; tofotofo mai ia te au, ma ia e silafia ou manatunatu; ma ia e silafia po o ia te au se ala e (te) tiga ai; ma e taitaiina mai a'u i le ala ole faavavau.” Sala.139:23-24.

O se tatalo lelei lea mo i tatou i aso uma, auā e 2 ni faafitauli e masani ona tatou maua ai:

(i) Tatou te le vaai ifo ia i tatou e pei ona tatou vaai atu i isi. Afai e le moni ma faamaoni lo tatou vaai ifo ia i tatou, e le taitai ona tatou malamalama poo fea tonu o taatia ai o tatou faafitauli. Ma afai tatou te le iloa, e le mafai foi ona tatou taitaiina i tatou ma le atoatoa. E faapea le tala o le alii o Feterika le Sili o Siamani na fetau ma se tasi tamā matua o savali atu i le tootoo i le isi itu faafeagai, ona fesiligia lea, O ai oe? Na tali le tamā, O au o le tupu. Na 'ata Feterika ma toe fesili, O le a le malo e te pule ai? Tali le toaina, Ou te pule ia te a'u.

(ii) E sili ona tatou inainā i isi nai lo ia i tatou lava. Tatou te faamasino i isi e tusa ma a latou gaioiga, ae faamasino i tatou e tusa ma o tatou faamoemoe. Pe afai tatou te faia se mea sesē, tatou te sosola ese mai le mailei ina ua tatou faapea ifo, e sa'o le faamoemoe na tatou faia ai. O le mea faigata, ua tatou fiafia e faifai pea ma faifai soo lenei mea, aunoa ma se mana'o e fai se suiga mo i tatou.

.....

3. O le loto o lē ua mafaufau na te maua le poto; o taliga foi o lē ua poto, e saili ia i le poto.” Faata.18:15.

Sa i ai ni alii e toalua na o e fanafana, ae pa'ū ai le tasi i lalo i le palapala, ua moeini mata ua lē mānava. Tago ane le isi i le telefoni vili le 911, Pei lava ua oti Pati! O le a se mea e fai? Tali

mai le tali telefoni, 'Aua le vevesi ae faatoatoa. E ao ona vaai muamua pe ua oti mo'i Pati. Ua sãõ, leai se pisa; ae mulimuli ane faalogoina le pa o le fana. Ia, lea ua mauiinoa ua oti Pati! O le a le isi mea e fai? Pe afai e ūtia pe taotaomia ma maua i tatou i le vevesi, ona tatou lē mafai lea ona lagona le mea o loo fia ta'u mai, ma e ogaoga lona i'uga.

O lea la: (i) E ao ona malamalama lelei muamua i tagata, ae lei taitaiina i latou. E tataua ona i ai sou silafia loloto, i le loto poo le fatu o le tagata. O le malamalama i faamoemoega ma miti a tagata, e fesoasoani tele i le fesootaiga vavalalata ma i latou ma faaosofia ai i latou. (ii) O le faalogo lelei e fesoasoani i le faaitiitia o faafitauli. O taitai lelei e mataala i mataupu itiiti ma faatauva; e faalogo i o latou lagona faalenatura ma amanaia. E le gata ina faalogo i manatu fa'aalia, ae lagona foi mea ua le faaleoina. E mafanafana le saogalemu e fesiligia ai pe se a le manatu o isi, ae le finau pe tete pe a oo mai faitioga. (iii) O le faalogo e fausia le talitonu. Ta'ua e se tasi fomai o le mafau, "O le mea sesē aupito telē e te faia i lou taumafai e talanoa ma faatalitonu isi, o lou taumafai lea e tuu lau faamuamua i le faamatalaina o ou manatu ma lagona. O le mea e aupito sili ona mana'omia e tagata, o le faalogo atu ia i latou, o le fa'aalologia o latou, ma ia malamalama ia i latou. O le taimi e faapea ai, o le taimi foi lea e faaosofia atili ai i latou e malamalama i lau mataupu ma lou manatu."

.....
4 "O lenei, ia e faalogo mai ia te au, ou te faatonu atu ia te oe..." Esoto 18:19.

O lou tiute faa-taitai o le vaai lea o loo faataunuu ma i'u lelei galuega o loo fai. Peitai a o faatuputupu pea le mamafa o le avega, e tataua ona saili i tagata e i ai taleni e talafeagai ma le galuega; auā afai e leai, o le a gata lou alualu i luma. Ae o le a le mafuaaga tatou te mumusu ai e saili tagata talenia ma fetai ma le galuega, ma tu'u i ai tiute ma tofi talafeagai? (i) Ona e tiga le tuana'i. Sa i ai se tasi na lape lana auaunaga ma ta'uvalea ai i tatou; ua avea lea ma mafuaaga ua tatou lē toe talitonuina nisi. (ii) Ona o lo tatou faamaualuga ma le manatu faapito. Tatou te lē manana'o e faasoa ma isi le ta'uleleia, ae ia na o

i tatou. (iii) Ona o le fia atoatoa. Tatou te lē manaomia le lamatia o tatou tulaga ona o tagata e a'oa'oina ma popoto mai le faatinoga o le galuega, ona tatou faapumoomoo lea o fuafuaga ia na o i tatou e silafia, mo le manuia lautele.

O le faafitauli lea o Mose a o feagai ma Isaraelu, ma o le auala lenei sa ia faaogā e fofō ai. Fai mai Ietero le tamā o lana avā, "E lē lelei le mea o loo e faia. O le a matuā tigaina oe atoa ma lenei nuu o loo ia te oe; auā e mafatia oe i lenei mea, e te lē lavā ona e faia toatasi. O lenei, ia e faalogo mai ia te au, ou te faatonu atu ia te oe, ona ia te oe lea o le Atua; ia fai oe ma tautuu upu mo le nuu i luma o le Atua, ina ia e tauiologologoina mea i le Atua....Ia e filifili foi ai le nuu atoa ni tagata o loto tetele, o e matata'u i le Atua, o tagata faamaoni...ma ia e tofia i latou e pule ia i latou e fai ma alii o taitoafe... taitoaselau, taitoalimagafulu...taitoatinoagafulu; ma ia latou faamasino atu i le nuu i aso uma lava; o mea tetele uma lava e au mai ia ia te oe, a o mea iti ia latou faamasinoia; ona faamāmā ai lea ia te oe, latou te fesoasoani foi ia te oe. Afai e te faia lena mea... ona e lavā tumau lea; o lenei nuu uma foi, latou te maua atu le mea latou te nonofo ai ma le manuia." Esoto 18:17-23. "Ua faalogo Mose i le tamā o lana avā, ua ia faia foi o mea uma lava na ia fai mai ai."

Afai e fia avea i tatou ma ta'ita'i lelei, ia tatou mulimuli i le faata'ita'iga lelei na fai e Mose!

AMO LOU SATAURO

O se tasi alii talavou sa fetaia'i ma le mamafa o faafitauli ma tauau ina lē gafatia tau'ave, ua faaososo mai le fia pule i lona ola. Ua aunoa se filemū ona faapa'ū lea i ona tulivae ma tatalo, "Le Alii e, ua ou lē mafai ona ola pea faapenei. Ua mamafa tele lenei satauro ou te amoina." Ona tali mai lea o le Alii, "Lou atalii e, afai ua lē mafai ona e tau'ave le mamafa o lena satauro, ona taatia ane lea i le potu lena. Ae alu i le isi potu le la e tatala le faitotoa, ma filifili se isi satauro o i ai e fetai ma lou mana'o."

Ua mapuea le taule'ale'a i le lagona fiafia, "Faafetai tele le Alii e, o le a faapena ona fai." Ona ia faia lea e pei ona faatonu mai. Ua tatala le faitotoa o le isi potu ona ia iloa lea o le tele ma

OSIGA FEAGAIGA EFKS FAGAMALO, ITU O TANE

O le Aso Lulu 18 Tesema 2019, na osi ai le Feagaiga a le EFKS Fagamalo, Pulega Gaga'emauga, Matagaluega Itu o Tane, ma lo latou faifeau Susuga Taulotoga Viliamu FS ma le Faletua ia Sago. O le susuga i le Toeaina o le Pulega, Palemia Tauiliili Reupena FT na ia ta'ita'i le sauniga ma osi le feagaiga. O le susuga Tanielu Tupusē FS na faitauina le Tusi Paia; o Ali Alapati FS na saunia talosaga, Atapana Pati FS na nafa ma le Lauga, ae faaopoopo ai le saunoaga faamalosiua a le Ta'ita'i o le Sauniga. O le afioga i le Tiakono Toeaina/A'oa'o Fesoasoani ia Seuamuli Fasi Toma, na fai ma sui o le Aulotu e molimau i la latou faiga filifiliga. Na ia ta'ua e faapea, na tu'ua le galuega e lo latou faifeau talu ai ua mālōlō penisione, susuga Sileli Tauaifaigā & Mere i le masina o Iulai 2019, a o le Aso Sa mulimuli o Oketopa fai loa la latou filifiliga. E to'a 54 le Faapotopotoga na auai o sui mai Matafale e 25 o le Aulotu na palota i faifeau e toatolu, lea na fulisia ia Taulotoga e 36. O lena lava Aso Sa na logo ai le i'uga o le filifiliga i le susuga Toeaina o Palemia, faapea foi le Faifeau o Taulotoga; mulimuli ane ua feiloa'i ma fai le fuafuaga mo le osiga aloaia o le feagaiga.

Na saunoa foi le Faifeau i la la'ua faai'uga na fai faalagolago i le musumusuga a le Agaga Paia, e talia le valaau e tusa o le faamoemoe autu na a'otauina ai i Malua. Na ia faafetaia le Atua i le fa'aaogaina o le tagata faatauva, ma le Ekalesia i Fagamalo ina ua afe ane la latou faatofalaiga paia ia i la'ua. O i latou na fai ma sui o le Pulega, Matagaluega, le Ekalesia Aoao, Nuu ma le Itumalo, na lūlū aao ma feiloa'i atu i le Faifeau ma le

Faletua, e fai ma faailoga ua faamautū, faamaonia le taliaina o i la'ua, e aofia ai Susuga Amuia Seuala FT (KMTA Mtg Itu o Tane), Tanielu Apineru FT (Pulega Gagaifomauga), Failautusi Matagaluega Penaia Europa FS, Panapa F. Too FS, Afioga Hon. Nafo'itoa Talaimanu Ketu (Faipule Itumalo/Sui Fofoga Fetalai), Rev. Eteuati Toma (EFKAS Leone), ma le Tiakono o Faamoetaulao Lasalo. O Taulotoga ma Sago o lupe na fa'ia mai le EFKS Fatuvalu na i'u mai Malua 2015, e valaau le Ekalesia o galue faa Ofisa Itu o Tane i le Matagaluega A'oa'oga Kerisiano. Ia faamanuia atu le Atua, ma ia viia Lona suafa i lo outou soifua galulue faatasi ai.

.....

AMO LOU SATAURO

le anoanoa'i o ituaiga satauro eseese o faaputu solo ai, o isi satauro e maoa'e le lapopo'a e tau lē iloa atu le tumutumu. E vaai atu le taule'ale'a i se tasi tulimanu mamao ese, o faalagolago mai ai se satauro e fou ona foliga, e aupito itiiti lava i satauro uma. Ua musumususu atu o ia, "Ou te mana'o i le satauro le la lo'u Alii e." Ona tali mai lea o le Alii, "Lo'u atalii e, o le satauro lena sa e tauamoina, lea faato'a taunuu mai nei."

Pe afai e tutupu mai toatūgā o le olaga nei ma foliga mai ua tau lē mafai ona tauamo, e lelei foi le silasila ane i ou autafa e te silafia ai isi uso ma a latou foi satauro, ma le tele o puapuagā, ae maise o avega mamafa i tiute ma tofi, o loo fetaia'i ma i latou. E aogā ai le faatusatusa o si ou faafitauli itiiti, ma le mamafatū o le avega o tau'ave e le toatele o isi. Pe lē faatusalia sina feau faigofie o e faia, i le galuega tele o fai e lou uso tuaoi. E te iloa ai e sili mamao le manuia lena e te i ai, nai lou manatu; ma suia ai lou faameo soo i lou faafetai i le Atua. Fai atu ai foi.

FAAPAIA MAOTA GALUEGA, EFKS SALEAUMUA

O le aso 23 Ianuari 2020 na faapaia ai le Maota o le Galuega o le EFKS Saleaumua, o galulue ai le susuga Pati Vili FS ma le Faletua o Matalena. O le Faletua o le Afioga Taitaifono Fono Tele ia Susana Tunumoso Iosia na ia 'o'oti le lipine, ma ulufale ai le faapotopotoga ina ua tau'a'aoina ki o le maota e le afioga Matuaofaiva ia Lauvao Paulo (Kamuta Fesoasoani: Aumua Aso AF, Seufalemua Malo TK). O le Toeaina o le Pulega Aleipata, susuga Timoteo Momoemausu FT na ta'ita'i le sauniga lotu e siitia ai viiga ma faapaleina le suafa o le Atua i le faaneetaga, ae maise le faafetai i le Ekalesia ma le afaigaluega mo le galuega mae'ae'a ma le matagofie.

Molimau le susuga Faafegaiga: E toatele le mamalu sa auai e molimauina le faamoemoe o le Ekalesia. E le gata i susuga i faafegaiga a o le mamalu lasilasi o tupu ma e'e tainane foi o uo ma aumea mamae aemaise o alo ma tama fanau a le afioaga na faimalaga mai atunuu mamao. Na maua luga atili lea aso ona o le faamalo'ulo'u mai o le afioga i le Taitaifono o le Fono Tele, le susuga i le Toeaina ia Tunumoso Iosia ma taua'aoina ai le \$10,000.00 o le meaalofo a le Ekalesia Aoao. Sa faapea foi ona fai meaalofo le afioga i le Taitaifono mo le faamoemoe, e \$1000.00.

Se a foi se faafetai matou te mafaia ona tuuina atu i le Atua ona o outou, aua o le olioli uma lava matou te olioli ai i luma o lo tatou Atua ona o outou. (1 Tesalonia 3:9) Na to'ia i matou i le titi lavatoa, aua ua taumasuasua le alofa ma le agalelei. O le aao mafola ma le foa'i faale-uso a Kerisiano, o measina saili gatā ia o le malo o le Atua e olaina ai le tulafono o le alofa, e pei ona masani ai le au faatuatua. O le sosia lena na tamaoaiga ai lenei galuega mai lava i lona amataga, e pei foi ona molimauina i lea aso. Na avea foi ma faagaetia loto i le Ekalesia, a'o tau ifoifo le savaliga mai le mauga tele sa a'ea.

E momoli atu ai la matou faafetai lē lava i le Ekalesia ona o la outou faasoa e pei ona si'i mai ai le fala si'i gatā o le afioga i le Taitaifono. Faafetai i susuga i toeaiina, ma le afaigaluega a le Atua, aemaise o paaga ma uo faapea foi aiga na alolofa mai i lo matou faamoemoe. E le faagaloina foi le taitaifono ma le mamalu o le mafutaga a Saleaumua i Niusila. E ui lava ina

sa mamafa le avega ma fita le tauasaina mai o le faamoemoe, ae o lea lava ua to'ai i nuu lelei, ona o lo outou alofa. O le viiga lava lea i le Atua e le faaititia. Ua tupu foi le olioli tele i o matou loto ona o le aao mafola ma le ma'au paia. E le gata i le foa'i i lea lava aso, a'o asiga e fia na to'ia ai le galuega a'o faagasolo. Afai ua le aofia se tasi i sa matou upu, e le nenefu i le Atua. Faafetai, faafetai tele. O le Atua o manuia na te toe faatutumu o outou fale saito ua faagaogaoina, ma toe totogi atu sautuatele lo outou alofa.

O tupe na fai ai le galuega na maua lava e ala i sailiga tupe a le aulotu na faia, e pei o Lulu, tausala, bingo ma isi. O le sao o le mafutaga a tina ma le autalavou, aemaise le alolofa mai o alo ma fanau o loo galulue i atunuu mamao, faapea foi le mafutaga a Saleaumua i Aotearoa. E \$181,199.00 le tupe atoa na mafai ona saili ma faaamaopopo e le aulotu. E \$50,000 mai le toomaga. O le seleni atoa na fai ai le galuega e \$231,199.00.

Tala o le Tupe faaaga o le galuega

Mea fau fale, masini, kiliva, etc	\$174,384.00
Eletise (Pese)	\$12,756.00
Maa fola/tiles (Fepulea'i Tui)	\$21,208.00
Faitoto'a & Faamalama Q & Q	\$3,350.00
Au Kamuta	\$3,917.00
Isi Tupe Fa'aaoga (mea'ai, 'ava, sikaleti)	\$11,353.00
TAU ATOA O LE GALUEGA	\$226,968.00

Meaalofo tama fanau Saleaumua ma e na agalelei

Posala Tioa	\$2,000.00,	Pua Paulo	\$5,000
Tutoatasi & Faletua (Faiaoga MTC)			\$1,000
Iese Lauvao	\$1,000,	Neva Tumutumu	\$2,000
Amakisi Tiimalu	\$3,000,	Asotasi Time FT	\$200
Alataua ma le Aiga	\$2,000,	Sepoima	\$1,000
Alo o Pua Paulo	\$3,000,	Mafutaga a Saleaumua i Niu Sila	\$26,535.
AOFAIGA MEAALOFA \$46,735			

O Leifi Ene ma Sunema ua la foa'i mai nofoa e 250 ma laulau e 20 e faatotogaina ai le fale. Pe tusa \$15,000.00 le tau o ia mea totino. O isi laulau e 30 na fai meaalofo mai ai le mafutaga i Niusila.

Ia foi pea le viiga i le Atua, ma na toe faatutumu atu le tamaoaiga ua faagaogaoina ona o lana galuega. Faafetai...faafetai...faafetai tele lava.

Pati Vili FS, EFKS Saleaumua

(Silasila itulau 20, mo le Ata o le Maota).

O LE SULU I O’U VAE & MALAMALAMA I O’U ALA

E TA’UMAMĀINA OE E LE ALI’I

Ua tu’ua’iina sesē/pepelo oe e nisi? Sa faapena foi le Alii o Iesu. Na latou fai ane o ia o le tagata ‘ai tele ma le inu uaina, o le uō a tagata ao lafoga ma ē agasala (Mata.11:19). Na latou molia foi le aposetolo o Paulo fai mai e leaga le ulu, o le vale ma le si’i i le lau. Ua ta’ua Satani e Iesu o ia o le pepelo ma le “*tamā o le pepelo*” (Ioa.8:44). Pe afai e te faasaga e fai le finagalo o le Atua, o le a alo ane foi Satani e osofa’i ma tu’ua’i oe i pepelo esecese, ma na te fa’aaogā isi tagata e faatinoa ana pepelo. ‘Aua e te faavaivai ai ma ‘aua e te atuatuva. E ta’umamāina oe e le Atua. Fai mai lana afioga, “*O auupega uma e faia e tau ma oe e lē manuia ia; o laulaufaiva uma e finau atu ia te oe i le faamasinoga e te faasalaina ia; o le tofi lena o auauna a le Alii, o a latou amiotonu foi mai ia te a’u lea, ua fetalai mai ai le Alii.*” (Isa.54:17).

Pe afai e te filifili e tau i ma sui ia i latou e tu’ua’iina oe, ona tu’ua lea o oe e le Atua se’i fai lou loto. Ae afai e te tuu atu lou tu’ua’iga ma ona tiga i Ona aao, ona avea lea o le i’uga o lena tofotofoga e fai ma molimau i Lona alofa ma le faamaoni i lou olaga. O lea ‘aua le maumauina le taimi e te faaseā ai, ae tatalo e pei o la le fai Salamo, “*Ia malamalama mai ou fofoga i lau auauna; ia e faaola mai ia te a’u ona o lou alofa. Le Alii e, ‘aua nei faamāina lava a’u, auā ou te valaau ia te oe; ia faamāina o e fai amio leaga, ia faalologo i latou i seoli. Ia faalologo laugutu pepelo; o e tautala faasiasia, ma le faamaualuga, ma le inoino i le tagata amiotonu.*” (Sala.31:16-20). Pe a faapu’upu’u ma faafaigofie, tau lava ina faapea ane, “Le Tama e, ou te tuu atu lenei pagatia i ou aao i le aso nei. Ia e ta’umamāina o a’u.”

.....

O LE FAAFESUIA’IGA O MANUIA

(Eseta 8: 1 – 8)

E faafesuiā’i manuia pe afai e matuā suia atoatoa mai le tulaga o faamanuiaga sa i ai, ae oo atu i le tulaga pagatia e matuā tuufaafegai ma lea sa i ai muamua. A lē o lena, e suia foi ma liua tiga sa

i ai, i le olioli o faamanuiaga e talisapaia mulimuli mai. O le Tusi o Eseta e tumu i faata’ita’iga o fesua’iga e tuufaafegai. I le faaiuga o le mataupu e 7 ua fasiotia ai Hamanu. Ua tu’u faafegai le manuia sa i ai o ia i le amataga, ae suia i le malaia ua oo i ai i le iuga - o le tau i lona loto vale ma faufau leaga ia Moretekai ma sa Iutā. Peitai e ui ina oti Hamanu, ae o loo i ai pea le tulafono na ia tusia ma ua uma ona faasaini ai le tupu o Asueru, ina ia fasiotia ai le nuu uma o sa Iutā; o tulafono a Metai ma Peresia e lē mafai ona toe soloia pe a uma ona faamaufaaailoga e le tupu.

O le amataga o le mataupu e 8, ua foaiina atu ai e le tupu mo le masiofo o Eseta, o le fale ma mea totino a Hamanu. O le faasologa lea o le tele o isi manuia mulimuli mai, e tuufaafegai ma mafatiaga sa i ai le aiga ma le nuu o Eseta. Ina ua ta’u atu Eseta i le tupu la te aiga ma Moretekai, ona valaaulia lea o le toeaina i le maota o le tupu ma avatu i ai le mama sa ia Hamanu, o le faailoga o le pule uma ua tuu atu ia Moretekai. O mea uma sa ia Hamanu i le amataga – o lona tulaga mamalu, o lana pule ma le paoa, ma ana meatotino uma, ua liliu ma tuufaafegai le tuuina atu ia Moretekai.

Ae le’i malie ai le masiofo i o la’ua manuia ma lona tamā, se’i vaganā ua faaolaina le nuu uma. O le ala lea na ia toe valuvalusia, faaoololoma’au ma faatoga mamate, ua faapa’ū, tagi ma aioi faatauana, ina ia alofagia e le tupu le puapuagā o ona tagata. Na talia lelei e le tupu le mana’o o lana masiofo ma lē na te fautuaina le maota, ae pagā lea e lē mafai ona toe soloia le tulafono a Hamanu ua uma ona faamaufaaailogaina. O le tali, ua tuu atu le pule ma le faitalia ia Moretekai ma Eseta la te tusia ai se isi tulafono fou e sili atu lona malosi, e faafetaia’i ai le tulafono muamua, ina ia puipua ma faaolaina ai le nuu o sa Iutā mai le oti ua uma ona folafolaina. Ma sa faapea lava ona faataunuu, le manuia o le faaolataga mulimuli ane; o mālama ua susulu e tuufaafegai ma le ao pogisa sa faamalumu ifo i le nuu o le Atua.

E pei ona sa faia e Eseta ma Moretekai le faaolataga mo le nuu o sa Iutā, o se faailoilo lava lea i le faaolataga tele e mulimuli mai, na maliu ai le Alo o le Atua a o fai i tatou mona fili. O le

mataupu tau molimoli lea a le aposetolo ia Roma (Roma 5). O le fesuaiga tuufaafegai o le Atamu muamua na oo mai ai le oti, ma Iesu Keriso (le Atamu lona lua) ua oo mai ai le faaolataga. E tuufaafegai le agasala a le toatasi ua oti ai le toatele, e lē faatusalia lea i le silisili o le faula'i o le mea e foaifuaina mai, o le alofa tunoa o le Atua ua ta'uamiotonuina ai le toatele, ona o le anaana o le tagata e toatasi, o Iesu Keriso lea. O le lu'i ma le apoapoaga a le aposetolo fai mai, *"O lenei, se a sa tatou upu? Tatou te nonofo pea ea i le agasala? Tatou te toe fia foi ea i le agasala? 'Aua nei faapea.*

.....

FAAOLAINA I LE TOE SEKONE

"O la'u pule lea e avatu lava i lē na mulimuli e pei o a oe lava." Mata.20:14.

O le faataoto i le tovine o loo faamatalaina ai e Iesu le faifaatoaga na ia faafaigaluegaina nisi i le aso atoa; amata mai le 6 i le taeao, o isi i le 9, o isi i le 12 i le aoauli, o isi i le 3 i le afiafi e oo lava i le 5 i le afiafi – toe tasi le itula mānava galuega o le aso. Na totogi i latou e tutusa uma lava e ta'i tasi le tenari. Ma o le taimi lea na felelei solo ai tomumu ma faaseā a i latou na muamua, e 12 itula sa galulue ai ae tutusa ma le ta'i tasi le itula, toe mulimuli i le faasologa o le totogi. Na tali le fai faatoaga, e pule lava o ia, e totogi le tagata mulimuli e tutusa ma i latou na muamua. Tatou te faapea ane, "O ai se tagata e mafai ona ia totogi atu le aso atoa, i se isi na galue mo le na o se itula e tasi?" O le tali, o le Atua - o le faiga lea mo le ulufale i Lona malo.

O tagata e salamō ma liua i luga o latou moega o le a maliliu, e tutusa ma tagata paia o le olaga atoa, i lo latou ulufale atu i le Lagi i le faitotoa e tasi. E eseese le aofai o latou fiafia i faamanuiaga; ae tutusa le alofa tunoa, e tasi le faaolataga ua faaolaina ai. E lē amiotonu ma lē sa'o i le fua faaletagata, e pei ona faaleo e le aufaigaluega i le faataoto. Ona faamanino atu lea e le faifaatoaga le tulaga tonu o le aiā ma le faitalia a le pule. *"E lē faitalia ea a'u ona pule i a'u lava mea?" Mata.20:15.* Ia faitalia Le pule.

Ua faamaonia foi mai le tala i le pagotā sa i le satauro, sa ia faamāumāu le ola a le Atua i le olaga atoa, afai e te talosagaina le alofa tunoa i lau toe mānava, e tali mai o Ia (Luka 23:42-43).

O le Ui'i Faamāumāu na ia *'faata'ape'ape'* mea uma i le nuu sa ia soona ulavale ai (Luka 15:13). O le uiga o le upu Eleni i le Tusi Paia ua faa-Samoaia o le *'faata'ape'ape'*, o le ata o se faifaatoaga o loo faasalalau solo ma lafoa'i ni fatu laau i luga o le elelee. O le ata lena o le Uii Faamāumāu na ia faalēaogā le agalelei o lona tamā, ua alu ese atu ma lafoa'i, faata'ape'ape, faasalalau ma faamāumāu. Peitai na ia toe foi. Ma ina ua ia faia lea laasaga, na silasila ma silafia mamao mai e lona tamā, ua mutimutivale lona alofa, ua tula'i vave, ua momo'e faanatinati, ua fusi faamaopo ma sogi ia te ia ((Luka 15:20). O le Tamā sa ia lavea'i le nofoaga/tofi o le atalii i totonu o le aiga. Ma e faapena foi ona ia lavea'i lou nofoaga ma lo'u nei tulaga i le ola faavavau. O le faaolaina i le toe sekone, o lona uiga afai o loo e faitauina nei upu (ae maise o Afioa a le Atua) ma e tali i ai ma le salamō, o loo maua pea lou avanoa e faaolaina ai; e te lē o tuai.

.....

IA FIAFIA I LAU GALUEGA

"E taitasi foi le tagata...ia fai foi lona tofi, ma olioli i lana galuega; o le mea fōa'iina e le Atua lea." Fai.5:19.

O le tasi vae tolu (1/3) o lou olaga o le a fa'aalu i le sailiga o manuia e te ola ai, ma e finagalo le Atua ina ia faafiafiaina ai oe. O la le Failauga, ia e talia ma ia e fiafia i ai, i lau galuega ma lou tofi ua valaauina i ai, o le meaalofo mai le Atua faapitoa mo oe. Ia e talitonu e i ai le faamoemoe o le Atua na la tuu ai oe i lena galuega. *"E mau i le Alii le savali o le tagata." Sal.37:23.* Pe afai e te malamalama i lena, o le a e fiafia i lau galuega ae lē musu ai, ma talitonu o i ai se fuafuaga a le Atua mo lou lumana'i. Atonu o se isi galuega fou, o le siitia o lou tulaga, faaleleia atili au taleni, ma i'u ina faamalieina oe ina ua iloa o oe se tagata e tūa le sao i le galuega tuufaatasi.

Pe a vaai le tasi mata i le taimi nei a o le isi mata i le lumana'i, ona faamalosia lea o oe ina ia faatino lau auaunaga ma ou tiute i le lelei e gata ai, ma ia faapaleina ai i viiga le suafa o Ia o loo e tau'aveina. A'oa'o uma mea e tataua ona maua, mai lou tulaga ua i ai nei – o le mamanuina o agavaa ma le fausia o le amio. Ia saunia lelei mo le faamoemoe o loo fuafua e le Atua mo oe.

Ae faapefea pe afai e lē manatu mai faapea le toatele o isi ia te oe, ae manatu faatauva'a ma le

IA FIAFIA I LAU GALUEGA

māmā ia te oe? E le'i manatu le aiga o Tavita e agava'a o ia mo le tulaga tau tupu o Isaraelu. Ae peita'i e ese le finagalo o le Atua, o Ia foi e faia le faai'uga mulimuli. Ma e i ai se a'oa'oga tāua iinei. Ia e faamaoni ma ia tausili ina ia iloga lou tula'i mai i le nofoaga ua tu'u i ai oe e le Atua; a oo i ona aso e tatau ai, ona Ia faamanuia lea ma siitia lou tulaga – ae ese lona tino mai nai lo lea sa e ulua'i manatu ai. *"O le Atua na te faamasinoina; o ia na te faamaulaloina le tasi, o ia foi na te faaeaina i luga le tasi."* Sala.75:7.

.....

MO TUPULAGA

IA FETU'UTU'UNA'I MUNIAO

Kenese 27: 22. *"...O le leo o le leo o Iakopo, a'o lima o lima ia o Esau."*

E i ai le uiga masani o mea nei o matua, pe afai e le o matua uma. E tusa lava pe to'atele le fanau, ae i ai lava le tagata pito pele ma alofa i ai le tama po'o le tina. Le tagata e fa'asili ma fa'apito i ai le alofa, o mea lelei uma lava, e nana lava mo le tagata lea. Pei foi o Iakopo, na pele ia te ia le tama o Iosefa, na fanau ina ua toeaina o ia...

O lenei uiga masani o matua, o lo'o va'aia i totonu o se tasi o ulua'i aiga o le tala fa'asolopito o Isaraelu. Le aiga o Isa'ako ma Repeka ma le la fanau e to'alua, o Esau le ulumatua (tagata tulimanu), ma Iakopo le ui'i. Ma o le tala e fa'apea, o le toeaina o Isa'ako e pele ia te ia Esau, a'o Repeka e auau i lona loto le ui'i o Iakopo. E fa'apefea ona iloa lenei fa'afitauli i totonu o le aiga?. O lo'o atagia i le vaega lenei o le tala... Fai mai ina ua iloa e Isa'ako ua lata ona aso ma ua tauaso foi, 'ave loa le 'avea'i ia Esau, ua fai le la taupulega fa'alilolilo. *"alu e tuli mai se manu mai le vao, fai ai se kuka manogi ou te 'ai ai, ona ou fa'amanuia ai lea ia te oe..."* Sa tatau ona 'a'ami uma tama e toalua, ta'u i ai le mea o le a fai, sa tatau foi ona i ai ma le tina o le aiga i lenei taupulega, aua o ia o le fautua, i mea e lelei ai le mafutaga. Peitai ua leai lava...

Ia o le mea na tupu e tusa ma le tala, ua alu atu Esau e tusa ma le mana'o o Isa'ako, ae galue loa Repeka mo se lelei o Iakopo. Fa'apei ona le manatu Isa'ako i se manuia mo Iakopo, fa'apena ona le manatu Repeka i lana ulumatua ua alu atu i le vao. O le vaega o le tala na faitauina, o le taimi lea na alu atu ai Iakopo ma le tama'i 'oti i luma o Isa'ako. O le a le mea na tupu?. A lea e fai mai le tusitala, ua tagotago atu le toeaina o Isa'ako ia Iakopo, ona fai mai lea o lana tala, *"O le leo, o le leo o Iakopo, a'o lima o lima o Esau"* Lea ua toe inu i le leaga o le alofa fa'apito. Lea ua olegia o ia o le tama o le aiga e le ui'i.

Silasila la i le mea na tupu ina ua fo'i mai Esau mai le vao. Talofa ua tautuauega lona tautiga, ua alu Iakopo ma manuia. Sa'o ai le upu a Vaea ia Apaula, "Apaula, ua e sau ua tautua." Fai mai le tala ina ua mautinoa e le toeaina o Isa'ako, o Esau lea fa'atoa sau, ona tetemu ai lea o ona lima, ae tagi auē ai Esau i le auē fa'alotulotu. Ma o lea e manino le tala, mai le aso lava lea, e le'i toe maua se filemu i totonu o lenei aiga. Na fai lava le folafolaga a Esau, o le tualuga o le mea lenei o le masa'a o le toto, ma le ola e ma'umau. O le mea na fai e Repeka, o le ave'ese o Iakopo mai totonu o le aiga.

Silasila la i le mea ua tupu, ua faitaga'i le fanau, ta'ape'ape le aiga, ona o le lē tutusa o le alofa o matua i fanau. Ioe, o le alofa fa'apito o le mailei a le fili e manu'a ai le nofo lelei o aiga. Talofa ia Esau, o ia o le ulumatua, a ua mamulu lona tofi i le 'ai e tasi, toe fao ma ona manuia ona o le alofa fa'apito o Repeka ia Iakopo. O le uiga o le igoa o Iakopo o le sisi'o, 'o le taufa'aoleole'. Maua manuia i auala fa'atogafiti. Ma na toe tau lava e le Atua lona fa'a'ole'ole lea i lona uso ma lona tama. Aua fai mai le tala, ina ua o'o ia Lapanā le tuagane o lona tina, na ia auauna ai mo tausaga e fitu, ona o le mana'o ia Rasela, ae aumai le tau i Lea. Toe auauna i le isi fitu tausaga fa'atoa maua le tamaita'i na mo'omo'o i ai.

Le au uso e, ia a'oa'o mai le mea na tupu i lenei aiga, e fai ma fagufagu i mafutaga i o tatou aiga, le va o matua ma nai a tatou fanau, le va o matai ma o latou 'aiaiga, le va o le pule mamalu ma tagata lautele, le va o le 'au failotu ma le lafu mamoe, le va o ta'ita'i ma le atunu'u. Ia 'aia lava nei galo, e lē lelei le alofa fa'apito, leaga tasi lea o mailei a le fili e fa'aleaga ai mafutaga. A tatou naunau ia to'afilemu ma fealofani a tatou fanau ave'ese le alofa fa'apito, leaga e manu'a ai lo latou saogalemu i le lumana'i. O le isi mea taua, 'aia nei lua ni leo i totonu o le aiga, leaga e fa'aailoga leo ai foi le fanau. Matua o le alofa e moni, a sesē le to'atasi e 'aoa'i uma fa'atasi, ia avea le sesē o le isi, e a'oa'i ai le isi. I le ma lea, 'aia le taumafai oe le tina e nanā se mea sesē a se tasi o le fanau, leaga e afaina ai le fa'atuatua ina o matua e le fanau. Ave'ese le alofa fa'apito, ae tu'u i ai le alofa e moni. Leaga, o le alofa fa'apito o le mailei a le tiapolo, a'o le alofa moni fa'amatua, e fa'atonu ma a'oa'i mai le fatu ma le loto e fa'amaoni ina ia manuia fanau i le lumanai.

Manatua o le fa'aolataga na fa'atino e Keriso, e lei faia i se alofa e fa'apito na o Isaraelu, po'o se alofa e fa'afoliga (alofa fa'a-atatifa), leai, o le alofa na fa'atino mai le fatu, le alofa e fa'amaoni ina ia magalo oe ma ola a'u i le Alofa Tunoa o le Atua.

Keneti Leaupetele T. FS

EFKS Savaia & Tafagamanu-uta.

.....

O LE VAIRASI OTI

(O se tala fatu faavae mai le faama'i oti COVID-19)

O Iose ma Mari ma si a la tama e 13 tausaga o Iosua sa nonofo i le aai itiiti o Lokauku i le setete o Kalefonia i Amerika. O loo nonofo i latou i lo latou fale, ua atoa nei le 2 vaiaso o taofia ai i latou i totonu, ua lē mafai ona toe ulufafo ona o se poloaiga mai le malo - o puipuiga mo le faama'i matautia o le Vairasi Oti ua pesia ai le lalolagi atoa. Pau le mea o fai nei o le faasagasaga i le televise e tulimata'i tala i mea o tutupu. Ma e ese mai ai tala o le manumalo Ioane Keneti e fai ma Peresetene, o loo laualuga pea tala i le faama'i

oti ua maliliu ai le faitau selau afe i Amerika ma le lalolagi atoa. O le galuega muamua lea a Peresetene Keneti na faasaga i ai – o le sailia o se fofo e tineia ai lenei faama'i mata'utia ua ta'ua e nisi, o se mala mai le Silisili Ese, ona ua faateteleina pulega fai-faamalosi, o sauaga i e matitiva ma le soona faaleaga o le si'osi'omaga. Ua faamalosi nei puipuiga i tulaga o Faalavelave Ogaoga, e aofia ai le tapunia uma o soo se a'oga, mafutaga ma auaunaga, vagana le Matagaluega o Falema'i, ae ia nonofo mau i totonu o maota ma laoa, e faatali ai le isi poloaiga a le Malo. Ma o le ala lea ua faapenei ai Iose ma Mari ma si a la tama o Iosua, na o le fesilisili poo le a le mea ua tupu, ua na o le tatalo ma anapogi i le aso atoa. O le aoauli o le Aso Sa na faate'ia ai i le faalogo atu i le televise o saunoa mai le Peresetene faapea, *“O le fa'aaliga lenei mai le Maota Pa'epa'e: Ua iite fanua-a-lalo, ua iloa Ataata o Taulelei; o le tala fiafia mai saienisi ua maua le auala e tineia ai le Vairasi Oti. E mafai ona fausia le vailaau, mai le toto o se tagata e lē o a'afia i le ma'i, o loo mamā le toto mai soo se ituaiga siama. O le mea lea lo'u atunuu pele, ia outou o atu i Falema'i lata ane, e siaki ai o outou toto, ia vave maua se fofō o lenei ma'i mo i tatou ma le lalolagi atoa. Talosia le alofa o le Atua, ia i ai se tasi e maua ai le toto mana'omia mo le vaila'au.”*

Ua o atu nei Iose ma Mari ma Iosua faatasi ma isi aiga uma, i maota gasegase ina ia tui ma siaki o latou loto. Ua na o le gatete ma le atuatuva le lagona pe se a lenei mala, a o faasolosolo auaua'i i totonu ma toe foi mai i fafo ma foliga fefe ma popole tele, e faatali ai le isi laasaga. E le'i leva ae tamo'e faanatinati mai loa le tama'ita'i foma'i o Kaperise i fafo ma taualaga mai, “Iosua Iose, Iosua!” ma le laupapa faailoilo o loo tusia mai ai foi le igoa “Iosua Iose”.

“O lo'u igoa lea e valaau mai, tamā.” O Iosua lea a o ia 'u'u mau le lima taumatau o Iose. E le'i uma atu le tala a Iosua ae ua papa'i mai lima o le tama'ita'i foma'i o Kaperise ma ta'ita'i ese.

“Faatali la'ia, o lo'u atalii le tama lea! O le a le mea ua tupu?” O le fesili lea a Iose.

“E lē afaina, 'aia e te popole. O lea ua faamaonia mai o le ituaiga toto lea o loo mana'omia e fetau ma le faamoemoe, lea e i ai le toto o Iosua. Ae

(silasila itulau 15)

RIPOTI MAI LE OFISA O AOGA A LE EKALESLIA

(Faaauau mai le Sulu o Fepuari 2020)

49 UlataVALAAU

SXCOOL - Tuasivi College

AGGREGATE SCORE - (ENG + BEST 3 SUBJECTS) - 249

English(Merit 79%)

Samoan (Merit 84%)

Geography(Beginner 33%)

Visual Art(Achieved53%)

PROGRAMME - Social Science

50 JamesTOALA (M)

SCHOOL - Tuasivi College

AGGREGATE SCORE - (ENG + BEST 3 SUBJECTS) - 248

English(Achieved56%)

Samoan (Excellence 85%)

Maths(Beginner 40%)

Economics(Achieved53%)

ComputerStd(Achieved 54%)

PROGRAMME - Commerce

51 Too FOLA (M)

SCHOOL - Nuuausala College

AGGREGATE SCORE (ENG + BEST 3 SUBJECTS) - 248

English(Achieved65%)

Samoan (Achieved65%)

Geography(Beginner 36%)

History(Beginner39%)

HealthPhysical education(Merit 79%)

PROGRAMME - Social Science

52 Repeka TOFILAU (F)

SCHOOL - Maluafou College

AGGREGATE SCORE (ENG + BEST 3 SUBJECTS) - 248

English(Achieved62%)

Samoan (Merit 71%)

Maths(Beginner 44%)

ACCOUNTING(Achieved53%)

Economics(Achieved61%)

ComputerStd(Achieved 54%)

PROGRAMME - Commerce

53 Priscilla MAOAMA (F)

SCHOOL - Nuuausala College

AGGREGATE SCORE (ENG + BEST 3 SUBJECTS) - 246

English(Achieved56%)

Samoan (Merit 83%)

Maths(Beginner 26%)

ACCOUNTING(Achieved53%)

Economics(Beginner43%)

ComputerStd(Achieved 54%)

PROGRAMME - Commerce

54 Rennae FINAULAUAKI (F)

SCHOOL - Nuuausala College

AGGREGATE SCORE (ENG + BEST 3 SUBJECTS) - 242

English(Achieved61%)

Samoan (Merit 79%)

Geography(Beginner 43%)

History(Beginner42%)

ComputerStd(Achieved 59%)

PROGRAMME - Social Science

55 Analua AH TAI (F)

SCHOOL - Nuuausala College

AGGREGATE SCORE (ENG + BEST 3 SUBJECTS) - 241

English(Achieved52%)

Samoan (Merit 74%)

Maths(Beginner 29%)

ComputerStd(Beginner47%)

HealthPhysical education(Achieved 68%)

PROGRAMME - General

56 Yvonne FIDOW (F)

SCHOOL - Maluafou College

AGGREGATE SCORE (ENG + BEST 3 SUBJECTS) - 241

English(Merit 75%)

Samoan (Achieved55%)

Maths(Beginner 20%)

ACCOUNTING(Beginner44%)

Economics(Achieved59%)

ComputerStd(Achieved 52%)

PROGRAMME - Commerce

57 Jahela FALEPOI

SCHOOL - Leulumoega Fou College

AGGREGATE SCORE (ENG + BEST 3 SUBJECTS) - 241

English(Achieved52%)

Samoan (Merit 74%)

Maths(Beginner 44%)

ACCOUNTING(Achieved54%)

Economics(Beginner46%)

HealthPhysical education(Achieved 61%)

PROGRAMME - Commerce

58 Mefiposeta SAPATI(M)

SCHOOL - Leulumoega Fou College

AGGREGATE SCORE (ENG + BEST 3 SUBJECTS) - 241

English(Achieved58%)

Samoan (Merit 78%)

Geography(Beginner 41%)

History(Beginner42%)

Visual Art(Achieved63%)

PROGRAMME - Social Science

59 Efaraimo AFELE (M)

SCHOOL - Leulumoega Fou College

AGGREGATE SCORE (ENG + BEST 3 SUBJECTS) - 239

English(Achieved51%)

Samoan (Merit 78%)

Geography(Beginner 42%)

History(Beginner28%)

HealthPhysical education(Achieved 68%)

PROGRAMME - Social Science

60 Parataiso MULITALO

SCHOOL - Tuasivi College

AGGREGATE SCORE (ENG + BEST 3 SUBJECTS) - 237

English(Achieved61%)

Samoan (Merit 76%)

Maths(Beginner 45%)

Physics (Beginner 49%)

ComputerStd(Achieved 51%)

PROGRAMME - General

61 Melema ALOSIO

SCHOOL - Nuuausala College

AGGREGATE SCORE (ENG + BEST 3 SUBJECTS) - 235

English(Achieved54%)

Samoan (Achieved66%)

Geography(Beginner 44%)

ComputerStd(Beginner49%)

HealthPhysical education(Achieved 66%)

PROGRAMME - General

62 Vanila FALEASI

SCHOOL - Tuasivi College

AGGREGATE SCORE (ENG + BEST 3 SUBJECTS) - 231

English(Achieved 64%)

Samoan (Merit 83%)

Geography (Beginner 38%)

Computer Std (Beginner46%)

PROGRAMME - General

63 Panini SILAO

SCHOOL - Nuuausala College

AGGREGATE SCORE (ENG + BEST 3 SUBJECTS) - 230

English(Beginner45%)

Samoan (Merit 79%)

Maths (Beginner 19%)

Economics (Beginner36%)

Health Physical education (Merit 70%)

PROGRAMME - General

64 Loretta CHUNGKWAN

SCHOOL - Maluafou College

AGGREGATE SCORE (ENG + BEST 3 SUBJECTS) - 230

English(Achieved54%)

Samoan (Merit 73%)

Maths(Beginner 33%)

Biology(Achieved57%)

Chemistry(Beginner 34%)

ComputerStd(Beginner46%)

PROGRAMME - Science

65 Molleyanntaelelaleaga MITI

SCHOOL - Nuuausala College

AGGREGATE SCORE (ENG + BEST 3 SUBJECTS) - 229

English(Beginner45%)

Samoan (Merit 76%)

Health Physical education(Merit 72%)

Computer Std (Beginner36%)

PROGRAMME - General

66 Maggie SIMONE

SCHOOL - Leulumoega Fou College

SCHOOL - 229

English(Achieved61%)

Samoan (Merit 77%)

Geography(Beginner 27%)

History(Beginner39%)

Computer Std (Achieved 52%)

PROGRAMME - Social Science

67 Yannis ATONIO VAAIMALU

SCHOOL - Tuasivi College

AGGREGATE SCORE (ENG + NEST 229

English(Achieved59%)

Samoan (Merit 81%)

Maths(Beginner 45%)

Physics(Beginner44%)

ComputerStd(Beginner41%)

PROGRAMME - General

68 Lusua SAMUEL

SCHOOL - Nuuausala College

AGGREGATE SCORE (ENG + BEST 3 SUBJECTS) - 228

English(Beginner45%)

Samoan (Excellence 86%)

Maths(Beginner 33%)

ACCOUNTING(Achieved51%)

Economics(Beginner46%)

ComputerStd(Beginner44%)

PROGRAMME - Commerce

RIPOTI MAI LE OFISA O AOGA A LE EKALESIA

(Faaauau mai le Sulu o Fepuari 2020.)

69 Sui LOPATIMENE
SCHOOL - Maluafou College
AGGREGATE SCORE (ENG + BEST 3 SUBJECTS) - 228
English(Beginner49%)
Samoan (Achieved61%)
Maths(Beginner 41%)
ACCOUNTING(Achieved51%)
Economics (Achieved56%)
Computer Std (Achieved 62%)
PROGRAMME - Commerce

70 Maria Rachel Eseta TASESA
SCHOOL - Maluafou College
AGGREGATE SCORE (ENG + BEST 3 SUBJECTS) - 228
English(Achieved58%)
Samoan (Achieved69%)
Maths(Beginner 19%)
Biology(Achieved53%)
Chemistry (Beginner 36%)
Computer Std (Beginner48%)
PROGRAMME - Science

71 Maletino TUPUTAUTAAFAGA
SCHOOL - Maluafou College
AGGREGATE SCORE (ENG + BEST 3 SUBJECTS) - 227
English(Beginner 49%)
Samoan (Achieved 69%)
Maths(Beginner 23%)
Computer Std (Beginner 40%)
Visual Art (Achieved 69%)
PROGRAMME - Technical/Vocational

72 Amata SEMAUAMATA
SCHOOL - Tuasivi College
AGGREGATE SCORE (ENG + BEST 3 SUBJECTS) - 227
English(Achieved57%)
Samoan (Merit 81%)
ACCOUNTING(Beginner41%)
Economics(Beginner48%)
Computer Std (Beginner34%)
PROGRAMME - Commerce

73 Lepetiomalo ASALELE
SCHOOL - Tuasivi College
AGGREGATE SCORE (ENG + BEST 3 SUBJECTS) - 224
English (Achieved 75%)
Samoan (Merit 82%)
Geography (Beginner 35%)
History(Beginner 41%)
Computer Std (Beginner 44%)
PROGRAMME - Social Science

74 Lui LUI
SCHOOL - Nuuausala College
AGGREGATE SCORE (ENG + BEST 3 SUBJECTS) - 224
English (Beginner 45%)
Samoan (Merit 77%)
Computer Std (Beginner 41%)
Health Physical education (Achieved 61%)
PRORGAMME - Technical/Vocational

75 Ila VAILIMA
SCHOOL - Maluafou College
AGGREGATE SCORE (ENG + BEST 3 SUBJECTS) - 224
English(Achieved55%)
Samoan (Merit 72%)
Geography(Achieved 51%)

History(Beginner39%)
ComputerStd(Beginner46%)
PROGRAMME - Social Science

76 Naniseli MISPATI
SCHOOL - Maluafou College
AGGREGATE SCORE (ENG + BEST 3 SUBJECTS) - 224
English(Beginner49%)
Samoan (Achieved66%)
Geography(Achieved 60%)
History(Beginner39%)
ComputerStd(Beginner49%)
PROGRAMME - Social Science

77 Faustina PULEMAU
SCHOOL - Maluafou College
AGGREGATE SCORE (ENG + BEST 3 SUBJECTS) - 224
English (Achieved 55%)
Samoan (Merit 71%)
Maths (Beginner 35%)
ACCOUNTING (Beginner 44%)
Economics (Beginner 49%)
Computer Std (Beginner 49%)
PRORGAMME - Commerce

78 Vanessa TAPUSINI
SCHOOL - Maluafou College
AGGREGATE SCORE (ENG + BEST 3 SUBJECTS) - 222
English (Achieved 62%)
Samoan (Achieved 57%)
Maths (Beginner 37%)
Biology (Beginner 49%)
Chemistry (Beginner 39%)
Computer Std (Achieved 54%)
PRORGAMME - Science

79 Roserbelt FAITAMAI
SCHOOL - Papauta Girls College
AGGREGATE SCORE (ENG + BEST 3 SUBJECTS) - 222
English (Achieved 55%)
Samoan (Merit 74%)
Maths (Beginner 31%)
Biology (Beginner 41%)
Chemistry (Beginner 30%)
Computer Std (Achieved 52%)
PROGRAMME - Science

80 Hana PUA
SCHOOL - Leulumoega Fou College
AGGREGATE SCORE (ENG + BEST 3 SUBJECTS) - 222
English (Beginner 49%)
Samoan (Merit 76%)
Maths (Beginner 27%)
ACCOUNTING(Achieved 51%)
Economics (Beginner 46%)
Computer Std (Beginner 46%)
PROGRAMME - Commerce

81 Fetuao IOANE
SCHOOL - Leulumoega Fou College
AGGREGATE SCORE (ENG + BEST 3 SUBJECTS) - 222
English (Achieved 69%)
Samoan (Achieved 66%)
Geography (Beginner 36%)
History (Beginner 47%)
ComputerStd(Beginner40%)
PROGRAMME - Social Science

82 Taufu'asinatala NAUMA
SCHOOL - Maluafou College
AGGREGATE SCORE - 221
English (Beginner 48%)
Samoan (Achieved 64%)
Maths (Beginner 47%)
Biology (Achieved 54%)
Chemistry(Beginner 39%)
Computer Std (Achieved 55%)
PROGRAMME - Science

83 Ioane KOSE
SCHOOL - Leulumoega Fou College
AGGREGATE SCORE (ENG + BEST 3 SUBJECTS) - 220
English (Achieved 51%)
Samoan (Merit 83%)
Geography (Beginner 32%)
History (Beginner 42%)
Computer Std (Beginner 44%)
PROGRAMME - Social Science

84 Faatafa MAMOE
SCHOOL - Tuasivi College
AGGREGATER SCORE (ENG + BEST 3 SUBJECTS) - 218
English(Achieved 61%)
Samoan (Merit 79%)
Geography(Beginner 35%)
History (Beginner 35%)
Visual Art (Beginner 43%)
PROGRAMME - SocialScience

85 Mollynurra SALEVANA
SCHOOL - Papauta Girls College
AGGREGATE SCORE (ENG + BEST 3 SUBJECTS) - 218
English (Merit 71%)
Samoan (Beginner 29%)
Maths (Beginner 22%)
ACCOUNTING (Achieved 54%)
Economics (Beginner 44%)
Computer Std (Beginner 49%)
PROGRAMME - Commerce

86 Senara FARANISISI
SCHOOL - Tuasivi College
AGGREGATE SCORE (ENG + BEST 3 SUBJECTS) - 217
English (Achieved 56%)
Samoan (Merit 78%)
Economics (Beginner 40%)
Computer Std (Beginner 43%)
PROGRAMME - General

87 Laitiiti SOPI
SCHOOL - Maluafou College
AGGREGATE SCORE (ENG + BEST 3 SUBECTS) - 216
English (Beginner 49%)
Samoan (Achieved 62%)
Maths (Beginner 24%)
Biology (Achieved 56%)
Chemistry (Beginner 39%)
Computer Std (Beginner 49%)
PROGRAMME - Science

88 Theresa POUNIU
SCHOOL - Leulumoega Fou College
AGGREGATE SCORE - 216
English(Achieved53%)
Samoan (Merit 79%)
Geography(Beginner 29%)
History(Beginner36%)
Visual Art(Achieved51%)

RIPOTI MAI LE OFISA O AOGA A LE EKALEZIA

(Faaauau mai le Sulu o Fepuari 2020.)

89 Vailoa TOFIGA

SCHOOL - Maluafou College

AGGREGATE SCORE (ENG + BEST 3 SUBJECTS) - 215

English (Beginner 46%), Samoan (Merit 76%)

Maths (Beginner 14%)

Computer Std (Beginner 34%)

Visual Art (Achieved 56%)

PROGRAMME - Technical/Vocational

90 Satuala SIONE ISAIA

SCHOOL - Maluafou College

AGGREGATE SCORE (ENG + BEST 3 SUBJECTS) - 214

English (Beginner 47%), Samoan (Achieved

65%), Maths (Beginner 25%), Biology

(Achieved 54%), Chemistry (Beginner 34%)

Computer Std (Beginner 48%)

PROGRAMME - Science

91 Jasmine MATAUTIA

SCHOOL - Maluafou College

AGGREGATE SCORE (ENG + BEST 3 SUBJECTS) - 214

English (Achieved 65%), Samoan (Achieved

61%), Maths (Beginner 28%), Biology

(Beginner 32%), Chemistry (Beginner 39%)

Computer Std (Beginner 49%)

PROGRAMME - Science

92 Taliloa TOVIO

SCHOOL - Leulumoea Fou College

AGGREGATE SCORE (ENG + BEST 3 SUBJECTS) - 214

English (Achieved 64%), Samoan (Merit

71%), Geography (Beginner 29%)

History (Beginner 38%)

Computer Std (Beginner 41%)

PROGRAMME - Social Science

93 Fetutasi SEFULUTASI SEUMANU

SCHOOL - Maluafou College

AGGREGATE SCORE (ENG + BEST 3 SUBJECTS) - 213

English (Beginner 43%), Samoan (Achieved

59%), Maths (Beginner 39%), Biology

(Achieved 55%), Chemistry (Beginner 41%)

Computer Std (Achieved 56%)

PROGRAMME - Science

94 Lagafuaina GALUVA

SCHOOL - Maluafou College

AGGREGATE SCORE (ENG + BEST 3 SUBJECTS) - 213

English (Achieved 53%), Samoan (Merit

72%), Maths (Beginner 24%),

ACCOUNTING (Beginner 42%)

Economics (Beginner 43%)

Computer Std (Beginner 45%)

PROGRAMME - Commerce

95 Faasalusalua LEVAO TUSIGA

SCHOOL - Maluafou College

AGGREGATE SCORE (ENG + BEST 3 SUBJECTS) - 211

English (Beginner 44%), Samoan (Achieved

66%), Maths (Beginner 20%), Computer Std

(Beginner 48%), Visual Art (Achieved 53%)

PROGRAMME - Technical/Vocational

96 Tanielu MISIPELEMA

SCHOOL - Leulumoea Fou College

AGGREGATE SCORE (ENG + BEST 3 SUBJECTS) - 210

English (Achieved 50%)

Samoan (Achieved 64%)

Maths (Beginner 43%)

ACCOUNTING (Beginner 27%)

Economics (Achieved 50%)

Computer Std (Beginner 46%)

PROGRAMME - Commerce

97 Sefirina VTIA

SCHOOL - Leulumoea Fou College

AGGREGATE SCORE (ENG + BEST 3 SUBJECTS) - 207

English (Achieved 50%)

Samoan (Achieved 64%)

Geography (Beginner 25%)

History (Beginner 32%)

Health Physical Education (Achieved 61%)

PROGRAMME - SocialScience

98 Fonotelueruah MALAEULU

SCHOOL - Maluafou College

AGGREGATE SCORE (ENG + BEST 3 SUBJECTS) - 207

English (Beginner 44%)

Samoan (Achieved 65%)

Maths (Beginner 16%)

Computer Std (Beginner 38%)

Food, Textile, technology (Achieved 60%)

PROGRAMME - Technical/Vocational

99 Liupapa LOPAU

SCHOOL - Maluafou College

AGGREGATE SCORE (ENG + BEST 3 SUBJECTS) - 204

English (Achieved 58%)

Samoan (Achieved 69%)

Maths (Beginner 29%)

ACCOUNTING (Beginner 37%)

Economics (Beginner 36%)

Computer Std (Beginner 40%)

PROGRAMME - Commerce

100 Celestine MEFIPOSETA

SCHOOL - Maluafou College

AGGREGATE SCORE (ENG + BEST 3 SUBJECTS) - 204

English (Beginner 45%), Samoan (Merit 71%)

Maths (Beginner 29%), ACCOUNTING

(Beginner 40%), Economics (Beginner 46%)

Computer Std (Beginner 42%)

PROGRAMME - Commerce

101 Mollizer UILI

SCHOOL - Maluafou College

AGGREGATE SCORE (ENG + BEST 3 SUBJECTS) - 203

English (Achieved 55%)

Samoan (Achieved 54%)

Maths (Beginner 36%)

ACCOUNTING (Beginner 45%)

Economics (Beginner 44%)

Computer Std (Beginner 49%)

PROGRAMME - Commerce

102 Telesia KAPELI

SCHOOL - Maluafou College

AGGREGATE SCORE (ENG + BEST 3 SUBJECTS) - 202

English (Beginner 39%), Samoan (Merit 74%)

Maths (Beginner 26%), ACCOUNTING

(Beginner 44%), Economics (Beginner 45%)

Computer Std (Beginner 44%)

PROGRAMME - Commerce

103 Tuuga MALAEAMANU

SCHOOL - Maluafou College

AGGREGATE SCORE (ENG + BEST 3 SUBJECTS) - 202

English (Beginner 41%)

Samoan (Achieved 54%)

Maths (Beginner 14%)

Computer Std (Beginner 41%)

Visual Art (Achieved 66%)

PROGRAMME - Technical/Vocational

104 Emily Rose TOGIA

SCHOOL - Tuasivi College

AGGREGATE SCORE (ENG + BEST 3 SUBJECTS) - 202

English (Achieved 65%)

Geography (Beginner 44%)

History (Beginner 34%)

Computer Std (Achieved 59%)

PROGRAMME - SocialScience

105 Francine SIAKI

SCHOOL - Leulumoea Fou College

AGGREGATE SCORE (ENG + BEST 3 SUBJECTS) - 202

English (Beginner 49%)

Samoan (Achieved 58%)

Maths (Beginner 30%)

Biology (Beginner 32%)

Chemistry (Beginner 23%)

Health Physical Education (Achieved 63%)

PROGRAMME - Science

106 Tofoi TULIMOLI

SCHOOL - Leulumoea Fou College

AGGREGATE SCORE (ENG + BEST 3 SUBJECTS) - 200

English (Beginner 36%), Samoan (Merit 81%)

Maths (Beginner 16%), Biology (Beginner

39%) Chemistry (Beginner 21%)

Health Physical Education (Beginner 44%)

PROGRAMME - Science

107 Faleupolu MALOTAU

SCHOOL - Papauta Girls College

AGGREGATE SCORE (ENG + BEST 3 SUBJECTS) - 200

English (Beginner 41%), Samoan (Merit 72%)

History (Beginner 37%)

Computer Std (Beginner 41%)

Visual Art (Beginner 46%)

PROGRAMME - General

108 Peter IUNI

SCHOOL - Maluafou College

AGGREGATE SCORE (ENG + BEST 3 SUBJECTS) - 200

English (Achieved 52%), Samoan (Beginner

45%), Maths (Beginner 36%), Biology

(Achieved 56%), Chemistry (Beginner 42%)

Computer Std (Beginner 47%)

PROGRAMME - Science

Faafetai tele mo le tapuaiga a le tatou Ekalesia i Samoa ma atunuu mamao.

Saunia: Rosita Esera

Faatonusili A'oga EFKS

O LE VAIRASI OTI

(mai le itulau 11)

fia siaki poo ua maua i le faama'i", o Kaperise lea. Ina ua mae'a le lima minute, ae matala loa le faitoto'a ma taufetuli mai i fafo o foma'i ma tausima'i ma le fiafia tele. Ua savali mai Kaperise ia Iose ma Mari ma fai ane, "Faafetai tele mo lo oulua atalii, o loo mamā lona toto e le'i afaina i le vairasi oti poo se siama o se isi foi ma'i; o le toto ua maloloina atoa e fetau lelei ma le vailaau o loo mana'omia. Ma o le a fa'aauau loa le polokalame o loo faatali le Peresetene ma le lalolagi atoa. Ua logo le vao tagata o fetaomi, ona alalaga fiafia lea i le faafetai ua maua le fofō. Ua te'i Iose i le toe sau o Kaperise ma le pepa e u'u mai lona lima, "Malie oe le tamā, e i ai le pepa e fia saina mo lau maliega, mo le ta'otoga o lou atalii." Ua tago atu Iose e saina le Pepa, ae vaai atu i le fesili, 'E fia paina toto?' e leai se aofa'i o paina o loo tusia ai. Na fesili Iose, "Tama'ita'i, e fia paina toto e tui? O le a le tele o le toto e manaomia?" Ua te'a nei le mata fiafia o Kaperise, "Ia oulua finagalo malilie, e tele ni paina toto e mana'omia, e mautinoa o lona toto uma o le a tui."

"Leai, oi e leai! o le a lena ituaiga vaila'au?"

"Ia silafia, o le vailaau lenei e mo le lalolagi atoa, e lē na o Amerika. E leai se isi lava tagata, e leai foi se isi auala na o le toto o Iosua. Ae ia saina loa le Pepa faamolemole."

Ua pei e gase atoa le tino o Iose a o ia saina le Pepa ma toe tuu atu ia Kaperise. Ua tuumuli ese le Tama'ita'i Fomai, ae tuu le avanoa mo Iose ma Mari e tau

folo malie le 'o'ona o le ipu ua la inumia, a o la'ua fusi ma opo la la'ua tama o Iosua. "Finagalo malie, ua oo mai le taimi e tui ai lona toto ma fai le vaila'au." Ona ave ese lea o le tama, a o tauivi Iose ma Mari i totonu o la'ua tiga matuitui, e ui ina lagona le fiafia ua ola le lalolagi mai le faama'i oti. Na fai le ta'otoga o Iosua; na tui uma lona toto ua mātūtū ma mago lona tino ua oti ai; ua gaosi le vailaau, ua faasafua ma faainumia ai le lalolagi o tagata na maua i le faama'i oti.

O tausaga mulimuli ane e fai ai sauniga faamanatu e manatua ai le faama'i oti, ae maise le oti o le atalii o Iose ma Mari ina ua tui uma lona toto e togafiti ai. O nisi e auai ma le loto faafetai; o nisi e na ona auai ae lē manatu mamafa i sona tāua, ma le toatele ua lē manatua lava poo ai Iosua? Mata e faapea ifo Iose ma Mari, "Na oti lo'u atalii, na uma lona toto ina ia outou ola, ae faapefea ona outou lē manatua?"

Mata e faapea foi se lagona i le finagalo paia o le Atua, i le maliu ai o Lona Alo pele e toatasi, na faamaligi uma lona toto paia, e faaola i tatou uma mai le vairasi o le agasala na tatou oti uma ai i le tino ma le agaga, ae ua tau lē amanaia e nisi lona tāua ma sona aogā; e pei o la Isaia, "*ua tatou lē manatua lava o ia.*"

Ia alofagia e le Atua le feagai ai o le Ekalesia ma le lalolagi atoa, ma le Faama'i Oti o le Covid-19. Ia manuia le Aso Maliu & Eseta o lenei tausaga.

AUA E TE TAUFAAVALEA

(DO NOT CHEAT)

E.Tuai: Mika 6:9-13. E.Fou: Mar.10:17-27

(Tusi Faitau Aso 15 Mati 2020)

E mafuli i nisi faipisinisi ma e fia mau'oa le faiga lenei o le taufaavaalea (cheat/defraud); i latou e naunau ia maua tupe faasili, ia tele tupe mamā, ae fa'aaoga ai auala 'alo e vave ma faigofie. Pei o faatau fualaau aina ma fai faitoto'a talo ae leai ni faatoaga, o faatau i'a ae leai ni vaa fagota. Latou te faatau ma le filemu mai ē lāina ma timu'ia, ma toe faatau atu i le tau faasili e maua ai a latou faasiliga ma tupe mamā. E fa'aaogā sesē le poto, e saili ma faaputu atili ai o latou fale'oa. E tusa lava o le pepelo ma le gaioi; o le lē faamaoni, amiolētonu, ae maise o le lē alofa i le va ma uso tuaoi; e faatogafiti, eleelea ma pi'opi'o, matape'ape'a ma tuinanau. A tuufaatasi nei uiga uma ona manino lea, o le taufa'avalea o le agasala matuiā.

O le taufaavaalea o le vairasi faati'apolo ua mama'i ma maliliu faaleagaga ai le toatele o le lalolagi. O le vairasi na amata maua i Etena, mafua mai le manu o le gata na faavaalea le ulua'i tagata. Ua la se'etia i le mana'o tele, ua galala i le fia 'ai i le pule ma le paoa; ua lē malie i mea lelei e lava ma totoe ua foaifuaina atu e le Atua; ua tosina i le mamalu, e maua faatasi ma le 'oa o le lalolagi. E le fia ola toilalo pei se mativa, ae fia ta'uta'ua pei o nisi atua.

(fa'aauau itulau 16)

3 LA'AU ITI

E tolu ni laau iti na tutupu a'e i tumutumu mauga,
Fai a latou miti, o moomooga ma nai mafauauga.
Le laau muamua ua tepa a'e i fetu fepulafi i luga,
Fai mai, a ou matua e fia fausia a'u ave ma pusa
Ia teu ai auro ma ario, taimane ma penina tautele
O le pusa e sili i pusa uma ua faia i le fogaeleele.

Le laau lona lua ua vaai ifo i le tafe mālie o vai,
O lona mana'o ia gaosi ia te ia se vaa o le fogatai
O le vaa e sili ona tele, sili le malosi ma le saosaoa
E feavea'i ai tupu ma tamalii, o e pule ma le paoa.
A o le laau lona tolu e fia ola pea i le tumutumu,
E fia ave ia ma laau aupito maua luga lana tupu.

Mavae tausaga, faalalo laau e tagata gaosi oloa,
Fiafia laau iti, o a latou miti o le a faataunuu loa.
Le laau muamua ua ave sa'o i le fale o le kamuta
E gaosi ai meafale eseese, o laulau nofoa ma pusa
Ae paga lea, o le faanoanoa inosia ma le ta'uvalea
O le pusa e fafaga ai manu o meaola taugaeleele.

O le fale e gaosi ai vaa, na ave i ai le uso lona lua
Ae talofa e, ua lē o se vaa tele pei ona sa ia fuafua.
Ua fausia ai le vaa fagota, e fetui na o vai tuloto,
Le mana'o lē taunuu, nuti le fatu vaivai ai le loto
Le laau mulimuli e lua ni utupoto na vaelua i ai,
Lafo i le faaputuga laau, galo ma nimo i le vaai.

Le pusa ua nofo faanoanoa, o lana miti ua leiloa
Faateia ile sulua e le pupula lanu auro ole fetu
Lana auaunaga i le fale manu, ona o tusigaigoa,
O i ai le pepe faataoto faamoe i le moega mālū
Le tama'i laau liu pusa ua fiafia ina o mautinoa
Ua na teuina le auro e sili, o le Alii o le Filemu.

Tau mālua solo le vaa, i lana pasese ua mamafa
Sefulumalelua alii seila, o faifaiva matapalapala
Lo latou kapeteni ua tofa, i le taumuli o le sa,
Pesi mai matagi, ala mai o ia faafilemu le afā.
Le vaa nai le tuloto lana faalepō lea ua taunuu
Ua na ave le Pule, le Matai, ma le Tupu o tupu.

O utupoto sa tanu pala, faafuasei ona toe laga,
Fausia le faaoosala, le tasi e tū le isi e faalava;
Toso solo i le ala, amo lona mamafa e le tagata
Tutu'i mai ona lima ma vae, taua luga ai sauaga
Faatū i luga le laau, ma le tagata o loo ia tautau
Faafitu ona tauvalaau, tutu'i le itu e le ta'i'au.

Pisipisia uma le laau, le toto masa'a na tafe ifo
Mai manu'a o le tagata, na lilofia ai si ona tino
Le faailoilo inri ua tuu, o lena tagata e tautupu
Ae lei maliu o lana toe upu o le feau ua taunuu
Pogisa le lalolagi, lūlūina laufanua ma le gatete
Le laau ua vaivai ma fefe ua fasia le Atalii pele

Ulua'i aso vaisapati, faafou mea uma e le Atua
Le tuugamau ua tuufua, le tagata ua toe soifua.
Le laau pei o le aeto, toe faafou lona taule'ale'a
Liua le fefe i le malosi, le loto faavaivai ua te'a
Lona matūpalapala, o le faailoga ole faaolataga
Sili atu nai lo lona mana'oga sa fai i le amataga

Se a'oa'oga mai la'au iti, ma i'uga o latou miti
Lau auaunaga lou tulaga o i ai fai le mea e sili
Faitalia le Alii, o la le pule i le lalolagi o taavili
Na te faataunuu ou mana'oga i Lona lava taimi
Sasa'e sisifo toga matu; ua la silafia poo le fea
Pule mai lo'u Matai lou finagalo o lo'u loto lea

.....

'AUA E TE TAUFAAVALEA

(mai itulau 15)

Ona tete'e lea i le poloaiga a le Atua, ua agasala
ua lē sao i le ola faavavau, ua oti faatasi atu ai
ma le lalolagi la te fanaua mulimuli ane.

Ma e pei o le koronavairasi i lenei vaitau, le
mata'utia o le pepesi ma sosolo i Isaraelu, o faiga
lē alofa a le 'au mau'oa i e matitiva o le nuu o le
Atua. Na tautala malosi i ai le au perofeta, ona e
tau solomua i ta'ita'i faalemalo ma le tapuaiga,
ona faamalosi ma lagolago i metotia
taufaavalea. E manino auala taufaavalea i upu a
le au perofeta. *"O loo i ai pea ea i le fale o le
tagata amioleaga o le faaputugaolua e maua i
le amio leaga, ma le efa faaaimago e inosia? O
loo i ai fua faatautau faaletatau, ma le taga o i
ai maa faaaimago. Ua tutumu ona tagata mauoa
i le faasaua, ua tala pepelo foi i latou o e mau ai,
o latou laulaufaiva foi i o latou gutu ua
faa'ole'ole ia."* Mika 6"10 - 13.

E matafelefele auala faatogafiti a mau'oa e saga
mau'oa ai pea, ae atili pagatia ai le mativa. E pei
o le faatetelē pasene o tului ma isi aiaiga o

‘AUA E TE TAUFAAVALEA

nogatupe, e fuafua ina ia lē mafai ona toe totogi, ona faoa lea o fanua ma mea totino. E faatau le toalua ma le fanau fai ma pologa e totogi ai, ae toe faatau ese mo le pea seevae pe a uma le aogā (Amosa 2: 6 - 8; 4: 1). Ma le tele o isi auala leaga, na tupu ai le toasa o le Alii, *“O lenei foi, ou te tā ia te oe, e tupu ai lou ma’i, ou te faatafunaiina oe ona o au agasala.”* Mika 6:13

E lē māmā i le finagalo o le Atua, faiga leaga ma lē alofa o loo tafili saunoa ai le au mauoa, i lana fanau matitiva ma le vaivai. O lona finagalo ia aiā tutusa, ma saofagā tutusa tagata uma i faamanuiaga e maua i le lalolagi na ia saunia. O le upu moni, o le tasi lea mafuaaga tele o le toasa o le Atua, na faatafunaiina ai le tapuaiga, ma faatafea Isaraelu i nuu ese, ia latou iloa le leaga o le ola puapuagatia pei se mativa, ma olopalaina i lalo o le pule a isi malo mau’oa malolosi. O ai na iloa, poo le ala lea o faama’i oti ua pepesi ma faaumatia ai le lalolagi i ona po nei? O fea a tua i ai le soona tafili saunoa o malo mau’oa i atunuu matitiva? *Ou te ta ia te oe, e tupu ai lou ma’i!* Mulimuli ane ua toe foi le tafeaga a Isaraelu, ae tumau pea lenei gasegase faa le tamaoia. Ua faateteleina auā ua faatulafono e le au faresaio ma le au tusiupu o Iutaia; ua talia le taufaavalea o se faiga sa’o e mau’oa ai, ina ua latou faitau o le ave ma mau’oa o le faailoga o le tagata ua i ai le manuia (shalom) o le Atua.

O le manatu lea sa i le taule’ale’a mau’oa, a o ia alu ane ia Iesu. E amata foliga manaia le tala i lana mataupu, auā na momo’e mai, ua naunau e fia maua vave Iesu, fia faalogo atu i ana a’oa’oga, ua fia maua le ola faavavau; na tootuli foi e iloa ai lona fa’aaloalo. Ae o ana uluai upu na iloa ai e taufaase’e, *“Le A’oa’o lelei e..”* Auala masani a le taufaavalea, e amata i le faalagilagi ma faalupe oe i upu molemole, ia nene’e se’etia tosina ma ioe atu ai. E le’i sesē ai le Alii, ae na o le matilatila ai o le vaivai o le mau’oa. Sosoo ma le isi ona faaletonu – o le taulagi o lona malosia na te gafatia mea tetele. Fai mai lana fesili, *Se a se mea ou te*

faia, ina ia ou maua ai le ola faavavau? Ua manatu e tutusa le ola faavavau ma mea faalelalolagi - mea ua ia ausia i auala pi’opi’o ma solitulafono. Ua manatu e mafai e ana ‘oa ma lana taufaavalea ona faatau le mea alofa foa’ifua a le Atua mai lona alofa tunoa, e leai se galuega, leai se tau, leai se totogi, ae maua fua i le faatuatua i Lona Alo e toatasi.

Ua faamanatu e Iesu tulafono e 5 - 10, tulafono faasino i le nofo lelei o le tasi tagata ma le isi. A lelei ona tausi le va lelei o tagata i le lalolagi nei, ona tino mai lea o le mata’u i le Atua e le o vaiaia. O le tulafono e 10, *Aua e te mana’o i le fale o le lua te tuaoi, aua e te manao i le avā, le povi, le asini, poo se tasi mea a le tuaoi;* o le tulafono lea o loo fia faamamafa e Iesu, le tulafono ua na silafia o loo soli pala e le taulealea, e ala ai ona tele ana oa. O le tulafono o loo puipuia ai le va nonofo lelei o le tasi ma le isi, ia ‘aua nei afaina le tasi, ona o le tu’inanau, le mana’o tele, mana’o lasi, mana’o leaga o le isi. Lea ua ta aofai e Iesu le tulafono e 10, i lona fai mai, *‘Aua e te agaleaga’* poo nisi faaliliuga, *‘Aua e te taufaavalea (Do not cheat/defraud/abuse/exploit).*

Na tuu le avanoa e Iesu i le mau’oa ina ia alu e toe vaai faalua, saili atili i le uiga loloto o tulafono ma ia ola ai. Ae paga! E faigofie ona ofi le maea i le pu o le au, nai lo le fautuaga i le taliga o le fiapoto. Fai mai lana tali, ua uma ona ia a’oa’oina ma tausia tulafono, o mea faigofie. E i ai nisi mea e faigata sei tago atu e fai? Ma o iinei na folasia ai e Iesu faiga faavae o lana faigamalo, i le ituaiga soifuaga i le lalolagi nei, pe a fia mulimuli atu ia te Ia, ma oo ai i le ola faavavau. Ia faatau ese le ‘oa, ma ‘ave mo e matitiva.

“Ona faanoanoa lea o ia ona o lea upu, ua alu ese foi ma le tiga, auā ua tele ana oloa.” O se lu’i faigata tele, auā o le aveese o le oa, o le aunoa foi lea o le mamalu, le pule, le taualoa ma faamanuiaga uma o le lalolagi nei pei o Iopu. Talofa i le taulealea ua lē o gatasi le futia ma le umele, na sau i le fia ola, ae tau mai o le oti. E le’i ‘alo le alofa moni, e lē faataamilo pe mili faa-u’u upu o le alofa o Iesu na silasila atu ia te ia, ma ua alofa atu ia te ia. O le alofa na ta’u sa’o le tali e ui ina tiga, e tu’u sa’o le gagana ina ia iloa e le tagata lana agasala ma fulitua i ai, e tupu lona salamō ma faaolaina ai lona lava agaga.

AUA E TE TAUFAAVALEA

E i ai le maota o le galuega a le isi aulotu i le Faasaleleaga ua faaigoa, E Tiga Ae Manaia. E tiga le fai ma soo o Iesu, ae a masani ai ona lagona lea o lona manaia. E lē o le a'oa'oga a Iesu, ia na o le tu'u o le taufaavalea - ia faautauta, ia faalelei ma faasa'o le fa'aagogaina o auala e maua ai le 'oa, e leai. Ae ia matua tia'i atoa le 'oa, lea e mafua ai le ola taufaavalea. I nisi upu, ia suia le matai mau'oa i le avea ma auauna mativa. Ia matuā faatau ese atu, ma avatu e ola ai isi tagata. Ia ola o se mativa amata atu nei, ina ia siitia ae ai i luga le tulaga o nai isi uso matitiva, ma ola tutusa ai tagata uma. Ona faato'a agavaa ai lea o ia e mulimuli ia Iesu, ma oo ai i le ola faavavau. Ina ua lē toe faamoemoe i le 'oa o le lalolagi, ae ua ola ma le mautinoa, e lava ma totoe le alofa tunoa o Iesu, e faalagolago i ai e maua ai mea e tatau mo aso taitasi. Ina ua lē toe i ai ni mea e faalavelave, faaluafesasi, ma faafelavei i le fai ma soo, ae ua tafatasi le tago i le suotosina ma amo lona satauro. O le valaau a Iesu e lē ina ia avea le taule'ale'a ma i tatou foi e avea ma tagata matitiva, ae ia fai i tatou uma mana mea faigaluega e faia suiga fou i le lalolagi, ina ua tatou faamuamua isi tagata, ia faalelei o latou tulaga, ae faasatauro i tatou ma o tatou mana'o. O le faiga lea, e tino mai ai le malo o le Atua ua aumaia e Iesu, i le mea o tatou ola ai.

Le Ekalesia pele a Iesu Keriso, ua faamanatu mai le feau o le Tala Lelei mo i tatou, ina ia toe silasila ifo i lo tatou avea ma soo, poo o gatasi ma auala o tatou ola ai. Pe afai o lelei i le fua faa-Iesu, ona faalelei atili lea mo Lona viiga. Ae afai o tatou pei o le taule'ale'a mau'oa lutaia taufaavalea, e ao ona vave sasa'a le fafao, toe liuliu le tofa, e suia ma salamō faamaoni. E moni e faigata, ae tatou te mafaia, auā e mafaia mea uma e le Atua. Na mafai e Iesu, o Ia sa tamao'aiga, a ua faamativaina ina ia tatou mauoloa i lona mativa. Na sasa'a atoa mai lona soifua, na maluu i le satauro ma faamaligiina lona toto, ina ia faaolaina ai i tatou ma maua le ola faavavau. Ia i le Atua le viiga. Amene. (*F.Sulu*)

O E UA FAI I LAGI

SEUAMULI LI'OMATUA VILIAMU COSTELLO VILIAMU

O le tama 63 tausaga lona soifua, sa fai ma tiakono i le Ekalesia i Apia. Peitai o lona faletua ia Toomata Mele, o le tiakono i le Ekalesia i Tanoalei'a. Sa soifua mai i ona matua o Kirisimasi Viliamu Martin William o Tufuiopa ma Malaela, ma Emma Henry Clay Wilson o Fagamalo. E to'a ono le fanau, ma fanau a fanau e to'a iva. Sa a'oa'oina i le Apia Primary, Leififi ma le Kolisi o Samoa. O ia o se kamuta a'oa'oina lelei, ma sa molimauina le fiafia e fai ana galuega faakamuta na o ia lava. O ia foi o se fai pisinisi. O se tagata malos, galue malos, peitai na maua o ia i le ma'i o le fatu. Sa faia lona sauniga faaleaiga i le aso 21 Ianuari 2020, i le fale Maliu o Sefo Pa'u, sa taitai ai le Susuga i le Faifeau Faiaoga Filemoni Crawley. Sa to'a tele e na molimau o ona aiga, ma lana fanau ma fanau a fanau. O ona toe sauniga sa faia lea i le malumalu o le EFKS Tanoalei'a. O a'u sa ta'ita'i, ma molimau i lona soifua faaleagaga. O le Afioga i le Sea Misiāfa Tyrell sa tatalo, a o le Susuga i le Toeaina ia Siolo Tauati, sa saunia le upu faamafanafana. Sa molimau le afioga i le tamaiti tiakono ia Toomata Mele Viliamu i le la mafutaga. O Alofa Viliamu le faletua o le faifeau faiaoga sa molimau e fai ma sui o le fanau. O le tamā o Varani Crawley sa molimau mo fanau a fanau. O le fetalaiga ia Manogiamanu Etuale sa fai ma sui o aiga o le tinā ia Toomata e molimau, a o le fetalaiga ia Seuamuli Bentin sa fai ma sui o le aiga o le tamā e molimau i lona soifua. O se tagata toamalie, e filemu, e le gaoiā, e le tautala soo, ae tumu i le alofa ma le faamaopopo i ona aiga, ma alofa i lana fanau ma fanau a fanau. Sa faai'u i lona oliolisaga tumau, i lo la maota i Tanoalei'a Vaivase uta. Ona faai'u lea i le pese faatofa a le Au Kerisiano, Talofa uso e, tofaina oe....Manuia lau malaga Seuamuli. *Enefatu Lesa FT, EFKS Tanoaleia.*

Malaetele Fausia Peni

O le tina matua ia Malaetele na soifua mai i le aso 29/10/1936 ae na faamanava e le Atua ana feau i le soifuaga nei i le aso 3/3/2020 ina ua 84 ona tausaga. O ona toe sauniga sa faia lava i le malumalu o le EFKS Laulii, o le ekalesia ua loa ona tautua ma galulue ai, i le aso 17/3/2020. O au lava sa taitai i ona toe sauniga ma faaulufaleina lona sa mo ona toe sauniga. O le fanau ia Ulufia ma le susuga i le Tausi Matagaluega ia Usoalii sa molimau i le mafutaga ma le tina i lo latou aiga ma le mafutaga faa-matua ma fanau, ae o le tina ia Eseta sa faia le molimau a lo latou aiga mai Poutasi Falealili. O ia molimau uma sa agai lava e faamatalaina le tina o se tagata e loto maulalo ma agamalu, e tau le lagona sona leo ae o ana galuega e iloa ai o ia aua ua toatele le fanau sa faafailele i ona lima ma ua manuia i latou. O lea lava foi le molimau a le faletua o le A'oa'o Fesoasoani ia Sina Tuautu na fai ma sui o le mafutaga a tina o le aulotu, e le lagona sona siufofoga ae leotele lava ana galuega, o se tina foi sa ia logosaia lava ma usitaia se fanoga e tuu atu e ui e le fetaituanai le soifua ua matua ma le faatauva o tina sa fai ma taitai i le mafutaga a tina. Fai mai le molimau a le Tausi Matagaluega ia Usoalii, o le molitofa a le Atua, sa ia alofa lava ma taumulimuli i le mea e agai i ai le galuega. Mai Piula agai i Faleula seia oo i Pata Falelatai i le mea o galulue ai nei. Sa faaautu la'u molimau i upu a Tavita ia Saulo e faapea, ou te le mafai na alu ma na mea, ou te le masani ai. Aua e le se tagata e malosi, e le se tagata e tele se tamaoaga, e le se tagata e mamalu ma taualoa, ae ua lava meaaloa a le Atua sa ia te ia e tautua ma auauna ai. Ua uluola le aiga, ma ua manuia i lana tausiga. O le susuga ia Pule, le Fesoasoani Katoliko na saunoa i le upu faamafanafana, ma faaaogaina ai upu a le Poto i le Failauga e 12. Ona faaiu ai lea i lona oliolisaga tumau, o a'u lava sa taitai ma matou faatofa atu ai i le pese faatofa a le au-kerisiano. Tofa Tina. Ia manuia lau malaga.

Pita Toleafoa FS, EFKS Laulii.

Lafai Lenisuli T Aisaka

Na soifua mai o ia i le aso 23 Me 1973, ae na valaau le Atua ma faamanava feau i le aso 30 Tesema 2019. O ona toe sauniga sa faia lava i le malumalu o le EFKS Laulii. O a'u lava sa taitai ma faaulufaleina lona sa mo ona toe sauniga, o le susuga i le Epikopo ia Talimalie Eveni sa tatalo ae o le susuga i le Faifeau ia Olive sa saunia le upu faamafanafana mo le to'alua ma le fanau, o aiga ma le nuu ua tu'ua ona o le valaau a le Atua.

Sa molimau lona toalua ma ona uso, ma lona tina ia Fialelei Simi o le sa tausia o ia, ma ta'ua ai o se tagata agamalu, loto maulalo ma to'amalie, ae galue malosi i le tau atina'e o lona aiga. E faagalogata lava i lona aiga ona o se tagata aumalosi ma galue malosi, o le kuka lava foi lea i lea aiga pe a tulai ni faalavelave tetele, ma e lei mafaufauina lava o ona ia taimi ae ua faia lava le finagalo o le Atua.

O loo maua foi i api o le galuega, na papatisoina o ia i lenei aulotu i le aso 14 Oketopa 1973, ae na ausaili i le tausaga e 1991 ma faaofia ai i le ekalesia i le aso 1 Me 1991. Na faaipoipo ma si ona toalua ia Vagana i Neiafu, Savaii ma foi mai ma galulue i le aufaipese i lenei aulotu seia oo lava ina valaau le Atua. O le a manatua pea i galuega lelei sa tautua ai e pei o upu o le Tusi, o a latou galuega foi e mulimuli mai ia te i latou. O a'u sa taitai ona toe sauniga i lona oliolisaga tumau ma faatofa atu ai i le pese faatofa a le au Kerisiano. Manuia lau malaga.

Pita Toleafoa FS, EFKS Laulii.



O E UA FAI I LAGI LE FOLAUGA



**SEUAMULI LI'OMATUA
VILIAMU COSTELLO
VILIAMU**



**MALAETELE FAUSIA
PENI**



**LAFAI LENISULI T.
AISAKA**



**MAOTA O LE GALUEGA EFKS
SALEAUMUA, PULEGA
ALEIPATA, MATAGALUEGA
LOTOFAGA LEPA ALEIPATA.**

(Silasila Itulau 7, mo le Tala o le Galuega)